

静居集 明 张羽

钦定四库全书

集部六

静居集

别集类五

明

提要

臣等谨案静居集四卷明张羽撰羽字来仪后以字行更字附凤本浔阳人侨居吴兴元末领乡荐为安定书院山长再徙于吴洪武初征授太常寺丞寻坐事窜岭南未半道召还羽自知不免投龙江死明史文苑传附载高启传中史称其文章精洁有法尤长于诗太祖重其文洪武十六年尝自述滁阳王事令羽撰庙碑何乔远名山藏亦称其文词典雅纪载行事详而有体顾其诗名尤着故編集者亦仅录其诗而文则未之及也朱彝尊静志居诗话谓其五言微嫌鬱轳近体亦非所长颇不免于微词今观其集律诗意取俊逸诚多失之平熟五言古体低昂婉转殊有浏亮之作亦不尽如彝尊所云至于歌行笔力雄放音节谐畅足为一时之豪以之接迹青邱先驱北郭卢前王后之间亦未必遽作蜂腰矣

乾隆四十五年九月恭校上

总纂官 （臣）纪昀 （臣）陆锡熊 （臣）孙士毅

总校官 （臣）陆费墀

●钦定四库全书

静居集卷一

（明）张羽 撰

○五言古诗

拟古

后皇有嘉树受命生南国
谬承雨露恩结根非一日
如何游闲子攀条摘其实一摘
已自伤况乃再三摘清霜凋绿叶荣枯良未测

今日上客至置酒临前楹
弦歌四座起中有击筑声
此曲谁所为丝急调不平窃听
不敢言下流人所轻回视匣中衣感德涕纵横

杂拟二首

離離池中鴈饮啄得其时
夕息藉芳荪朝游荫阶基
仰视云间翼嗷嗷西南飞朔风
摧羽翰严霜下霏霏辛苦万里道所免寒与饥倘垂终养惠岂乐衡阳栖

朝出上东门遥望北邙坟
凄凄挽者歌咽咽丧车轮旌竿日日满碑碣朝朝新昨来
送塋人忽奄及其身朝为席上珍暮为泉下尘惜哉当路子为乐须及辰有金不趣卖当
为谁所吝

杂诗并序

予屏处闲默久絶篇章维时新春偶感岁月慨然兴言既度自课成帙輒书之以见
襟抱随事为篇杂出无伦题曰杂诗

其一

青阳萌始节万物咸光昭我亦动新懷
晞髮起晨朝俯览手中镜仰看枝上条
枯卉有再荣华发行已焦总角服遗训
老大望愈遥不伤华发衰但恐志气消
业成在永久期之于后凋

其二

右军懷逸民向平悟易卦如何不決去皆云待婚嫁
区区儿女情達士何足挂我今履其境此语不深訝
嗟予喪乡土旧業廢耕稼連蹇五九年玄發忽已化
一女首甫笄兩男肩相亞依依向父情欸欸接言話
素懷歸衡廬顧此豈遑暇寒鷄翼其雛鳴鳩均上下
物性猶有然人情諒難舍何當携幼稚盡室騰遠駕

其三

蜀嚴好沉冥日食止百錢卜筮人所輕久幽操彌堅
君子有所貴乃不在當年百歲有知音何如鍾期然
子云太區區譽聞公侯間卑哉益州牧乃欲吏高賢
豈無君侯貴敢見不敢言斯道誠兩得永為後世傳

其四

此邦非吾土寄迹聊在茲旅食何所營亦復假耘耔
玄夏苦霖潦良苗奄離披至今畎澮間余波渺相思
行恐春澤盛畊耒失其時共虞斯人艱豈獨念吾私
先師有遺言耕也有時飢且當竭所務天道非我知

其五

昔予居南山樂有同心人形迹不覓乖棟宇復為鄰
有酒更相呼得粟還共分時時榛曲中相携誅荆薪
兩賢不相猜所貴得其真一朝各異路隔涉吳與閩
拙宦失其宜薄責恒苦辛慈母抱沉忧兴言涕盈巾
昨者訪故廬松竹稍或存依依親旧迹戚戚感良辰
命駕欲相求風波限通津尚想古人交俯仰愧此身

其六

士有避世者高居浙河源王室方橫潰斯人獨高騫
抱瑟倚衡門清風拂朱弦舉世莫能屈乃獨詣任延
掃門思為辱尺牘情屢宣道義有相激權位非所先
周公下白屋斯禮自古然區區功曹檄何足致高賢

其七

生平頗愛酒未嘗自斟酌一與佳賓遇陶然不復却
雖得一醉歡傷生莫自覺况復

多谬妄空为俗所薄静言思利己一止良不恶东邻有父老顾武忽大噓与子共秃翁忍
弃予中爵酒为损荣卫多忧正相搏呼儿流新酿且复共酬酢醉罢各相恕谁能责狂药

其八

青青女贞树霜霰不改柯托根一失所罹此霖潦多高枝委为薪落叶掩庭阿弱柳
对门植秀色一何佳物性固有常变幻其奈何

其九

伯鸾舂吴市伉俪乃相之布衣日操作椎结无容辉居贫敢忘敬举案与眉齐斯人
亦何修感彼糟糠妻买臣躬负薪室家请长辞岂惟匹妇丑君子谅有亏周道兴闺房衽
席岂为微所以冀缺耨重耳任不疑斯道久寂寞拮据为此诗

其十

余生惮遠役旅寄百里余自从去家来岁月忽已除绪晏人事迫卷帙还故居扬舲
发东皋挂席指西隅且从家私务暂与友生疎渺渺遵溪渚行行入吾庐依依携童弱葛
葛会里闾启扉玩东园绿叶荣废蔬采之侑春酒数酌忘饥飧但苦宿潦荒美秫无旧储
犹当望来稔尊中长不虚空名百岁后此事非我须

其十一

抱拙衡门下久矣忘鸣琴凝尘翳其徽弦絶调亦沉时还置我膝命酒聊自斟高歌
出金石拂拭趣已深酣来枕之卧冥此千古心吾亦忘吾耳何事有声音

杂诗

戚戚多忧思悠悠悲夜长摄衣坐窓间仰睇明月光明月有盈亏轨度岂无常南箕
与北斗万古不更张人事有大谬天道信茫茫泠泠山下泉汨汨谷中源中有双鲤鱼浮
游戲波澜江汉岂不深欲往道无縁风云谅难遇栖栖守故渊但恐勺水枯终为渔者怜
感此令人悲置身良独难

懷方员外彝

丹霞散沦阴皓月出东山惊飙鸣高树飞鸟遶林间揽衣起徘徊白露浩已团岂无一樽酒慰此中夜寒良朋邈已远独酌岂成欢熏莸不可和胶漆不可解自非同心交谁能久不改

立秋日早泛舟入郭

连霖启秋期金气晨已兆清云合余阴水霞相照耀登舳泛凉风乘流驾奔峭回舟荡尘襟青山列远眺蒲葢迷森沉菱荷争窈窕沙明众女浣潭净孤渔啸端居积尘忧暂出窥众妙好爵岂不怀卫生乃其要寄谢沧洲人予亦堪同调

游戴山

云罗横四海田野无遗英尚赖二三子共怡山水情煦煦新阳动寥寥天宇清昔人称四美兹晨遂成并前登高丘阻遥睇澄湘明憑林招远风松桧自成声俛仰天地间微躯良不轻安能自羈束坐使众累萦处贱足为贵抱素詎非荣逍遥解神虑庶以适吾生

雨后戴山游眺偕黄孝廉陈茂才

积雨限游步超然怀远观虽微千仞冈孤岑且流玩冀展东山望一寫川上叹如何方此时气雾鬱未散玄云蔽白日八表洞漫漫川原近莫覩安能（阙）云汉耳目既罕适沉忧将何缓感兹一以悟滞景中自乱内照苟昭旷通蔽非所间由来君子道尸居或龙见伏雌乃默化何必收摇翰去矣齐物变卑栖永遗患

和答童中州

皇情春乐育建官宗圣黉秩微道则重人钦化乃行若人嫠女秀经义宿所精辞归旋楚（阙）祗版赴雪城郑公论墨守董子着清明抠趋仰贤范園桥聆德声跂予望已久覩止愿未并谁谓在類初遽申伐木情偕彼四三子乘流造柴荆倾蓋略宿晤盍簪慰中诚草具岂为礼所欣接光荣恭承宴集篇华采灿若英盛德多自负谁敢下后生简年子先施仰高余（阙）盈愧余避事来久矣废将迎岂不懷旦暮綢然限音声形神交靡间心照数自轻斯章拟成报七襄徒空名

初至西林喜遇幼文

与君三秋别成此一会期清言美无度离绪忽相遗况复在丘园俱无冠带縻逶迤
下田游皎洁艳阳时桃红媚墟圉牟绿遍川坻覆觞申宿恋开帙问新知澄懷悟渊泳脱
迹仰冥飞幸同赏心遇白首永无违

懷古

生平慕游侠驱马遍东周周人重千金所遇非我俦抚剑登泰山历览鲁与邹小儒
事弦歌龊龊安足由北临邯鄲道平原旷悠悠常闻虞卿贤斯人不可求悲哉穷途士缓
急将焉投

招隱

狗名趋华阙逐利居市廛山林何所事有道在丘园结构依岩穴绿萝荫门前鷓鴣
巢高栋猿猴戲庭间仰睇大壑阴俯咏圣人篇薇藿以充虚褊褐聊御寒场苗岂不美白
驹逝翩翩鹿鸣有旨酒我思在寒泉杂县愁钟鼓物性有固然长谢嚣尘外逍遥养余年

题娟静轩

绿竹有异质夙着风人篇猗猗瞻淇隈簞簞懷卫泉拾遗美形容复有娟静言微植
被将饰丽句永流传若人同所尚掇辞以名轩攢玉矗森森总翠郁芊绵鲜标贯寒日密
叶冒清涟遥想佳雨余静对罢鸣弦濡翰传霜节搦管象春妍聊探词人妙默寄图绘宣
逝将泛涛江息驾依名园攀枝扫石月憩阴濯寒泉虽微求羊高请附嵇侯贤緘诗存所
钦纏系日为年

听香堂

粲粲岁寒花幽香静中起人皆待三嗅子独受以耳辑彼琼瑶白长謡自为喜声中
岂无香闻觉无异理更愿息声尘色香同一委无闻亦无听冥然混沌始

寄题北山堂

雨罢寺楼晓曲堂秋树间暂辍今朝讲一玩北湖山仰瞻上方云遥见林屋关飞淙
尽日雨流禽先暮还即境知妄迹观空怡妙颜余乏道门旧阻陪高坐闲驰咏终非倡当

龔一追攀

題陳惟允臨刑所畫

若人悟縣解委蛻順天刑慷慨赴東市一日為千齡李公悲上蔡陸子喟華亭識機
苦不豫達生良可經朱弦亦易絕灰景不可停從容洒芳翰炳煥若丹青妙藝永傳世精
魄長歸冥披圖懷平素清淚緣襟零

奉答吹台先生送蜀山人見簡之作

若人辭天階消搖寒江汜言送將歸人復念中林士殷勤吐芳藻綢繆寓深旨文虹
被林薄簡珠照泥滓子畏伐檀刺余懷白駒美道同無殊轍神交有妙理索居序已積孤
游情難委寫心酬妍倡怛焉愁下里

大雨山中作

重陰翳秋節霖潦無時作虺虺伏雷震浩浩洪湍落浮槎懸修磴涌泉淹高閣禾黍
浩縱橫良疇殫為壑頽梁斷來術垣間增蕭索塊坐空堂上展卷莫為樂雖微農夫憂內
顧無儋石先民有遺言君子貴處約抱關非吾事嗟來非吾食去去遵時命南山有薇藿

題畫

吾愛陶弘景開窓玩白雲白雲自舒卷青山無垢氛清耳延松籟齋心閱瑯文問道
虛皇老結客古茅君靈藥青童種名香桂女焚萬乘遙致敬三尺久離羣丹成上鶴去弃
俗等拏紛斯人不可見斯世亦徒聞我獨懷仙契千載仰清芬

節婦詩

行者不復歸處者長相思昔與君別者乃為大暮期杲杲白日光其雨在何時惟有
明明月可以比容輝兔絲附女萝窈窕不相離青青忽已槁纖纖難自持他山豈無木林
木豈無枝念彼綢繆好甘隨秋草萎感茲以終老鬢髮已如絲耿耿栢舟誓千載同所歸

戴山石上听松風偶咏

溷耳俗誼久兹晨一清听长松逶鲜森哀壑互相应奔腾骇涛濑窃渺韵笙磬至音不假器始觉自然胜縁触故成声动极还归静此时憩石坐默然待其定乃知弃瓢者未悟闲中性

三月三日期黄许二山人游览不至因寄

曜灵无停机四序互相更惟有暮春节在昔重其名姬旦城洛邑多士方来并羽觞随流波逸诗存遗声秦王临河曲高会列簪纓金人奉长剑夷夏俱来盟伟哉霸王业小人非所营独爱晋诸贤流风有余清亭前列茂树修竹荫峥嵘幽兰文緑坂流湍左右鸣济济少长集鲜鲜春服明中有王与谢文笔冠羣英縁坻玩流转列坐无所争觞来不复停篇翰随意成一醉達天和旷然遗死生俯仰宇宙内何物累其情我欲效斯人兹晨且游行如何千金诺翻自意所轻叹去愁方结望来念徒萦良游诚难遇默默掩柴荆

春日陪诸公戴山眺集暮入兆麓得石床岩洞诸胜

张宴凌山极返策揭涧阴南岑夙厌歴北麓今始临危磴絶来术崩壑瞰空潭幽冥抱虚白哀牝逶清音旁探闯窈窕侧坐倚岖嵌古苔文已驳春蒲茸渐深幽禽鸣相续惊麋窜莫寻扳萝冒修袂折兰芳素襟竒踪閤自古胜赏发予心虽微舞雩咏敢谐溱洧吟山河永衿带微生终陆沉愧乏古人操将何视来今

余扁所寓山堂为清晏盖摘右军帖中语也蜀山隱君为书三大字刻着楣间林壑增胜因而成咏

少年未识事冠带逐时流一悟名为妄悠然返林丘假此精舍居萧条岩径幽竹树共清密川涧屡环周高峰延新旭华栋鸣晨鸠晞发东轩下羣书散不收嘉名余始制妙翰若云浮况有同心友觞咏接绸缪始来适朱夏今已踰素秋谬处山水宅慚非仁知俦耽玩昧出处栖泊愧淹留诚知非吾庐且得性所求

于书麓中得吹台所寄诗遗稿

拂尘启敝篋忽览故人诗抚迹疑若存惊逝杳难追忆昔吴苑游文采众所推名谈析妙理华襟吐芳词子时曾城北高（阙）临清池焚兰延佳月对酒弹清丝谁云兹夕欢乃为千载期冥漠游魂遠凄凉亲翰遗墨尘尚留（阙）纸敝犹含滋玩此涂洒泽想君哦咏时华章未及振厚意良已亏收竟一长恸林风响余悲想当寫寄日兹感君詎知

沈集自钱塘归作此示之

钱塘昔所游形胜此邦最尚想鳳凰山飞翔落天外胸吞沧溟寬江水渺如带海门
岂天设屹立两峰对汐潮类臣妾朝暮屡进退羣峯（阙）明湖浸淫百川会不意玉女
盆居然堕闾閼崔嵬白塔寺零落（阙）宋内荒阶与断础龙凤纷破碎昔闻亳社屋厌
镇信可恠岂徒鞭荆尸戮辱极狼狽妖僧固可醢国家岂无罪雷师秉炎火楚荡意颇快
至今遗民过涕泣行且拜尔游何草草吊古须我辈落日望东南临风发长慨

懷景佺师

旅宿厌卑誼爱此僧居静莲宇已摧颓茅斋自清迴山光林际来野色雨中净池水
不生瀾袈裟坐相映累日滯幽寻綠苔应满径

寄杰上人

想望东西陌共掩林中扉谁言儒道异（阙）善理同归昨欵精舍游步经园径微
高垣夏木绕綠阴生昼扉振锡还山去空壁挂禅衣何意幽栖侶佳会亦相违离合两俱
安去来宁有依梵空自足遣了此人我机

答黄孝廉雨中见寄

飞雨洒门阁庭溜夕已深凉飈惊幽幔秋气薄单衾暝壑无霁色寒蛩多苦吟室家
旷修渚朋知阻遥林离羣易成咎独处难为心赖此几上书（阙）能独幽襟念子懷癡
忧丰蔀方滯淫遗我愁霖唱要我西山岑（阙）未遂陟旨酒思共斟毋惮沾衣苦倾耳
迟挈音

贈道士吳秋云

飘飘三素云鬱鬱秀玉标清明合九气高游冠神霄凝化沦无迹廓落乘素飈停阴
希甘澍灌溉兴庶苗冥真无去留灵根永不凋真人保黄宁精炼五浊消控驾浮玉洞飞
裙歛烟飘吾英回黄旗司命讲洞謠淡游何方所享此年刼遥

舟中

朝发戴山岑夕逗金溪渚云天方寥栗川途屡回复飏驶岸疑转棹奔山似逐鸥鸟
随波泛霜澌含苔绿依依浣女影裊裊榜人曲采奇忘来遥耽胜成往速悦生良可懷狗
名非所欲请识孺子歌去矣从我独

寄吴隱君

若人蕴真趣飘飘懷古仙振衣入遠岳顺风祈一言寂歷微妙韵精明天老篇清垒
和玉齿焚香礼轩辕九咽华池液七返流珠丹頤性得天和齐物同化先五芝非吾茹聊
以苏世癡神期苟冥会飞步升九天抗迹游浮丘麾手招僊侗下视仓扁流永为尘网牵

咏斋前紫薇花

彼美掖垣秀遗此荒园中赋质非有异置身偶不同屡供樵爨余生条幸不穷蒙茏
委榛莽灌溉哄人工谓同众卉弃忽有孤花红（阙）长不择地始知元化工褰衣遶清
癯轻香散晨风似感幽士知芳意默自通一闻清露翻预恐彩云空等是荣谢理何待植
南宫

题倪云林竹枝

南州有高士乃在延陵东清时不肯仕灭迹云林中拂石坐萝月弦琴寫松风焚香
坐黄老望云送归鸿门车常自满尊酒无时空乘兴面沧洲古人未为工干戈困末路白
首随飞蓬名山乖始愿羈游无所终赖有车武子能哀阮籍穷倾壶醉陶令避堂延盖公
流俗轻高贤贫贱困豪雄孤鳳混鸡羣野鹤摧樊笼岂无梁鸿徒不闻皋伯通吾将传遗
迹清芬千载同

送许尊师还大涤洞

青山九琐处白发一龕居清斋诵黄老不阅世间书餐霞养真气对月礼空虚暂来
流水地应与孤云疎遥知还山日仙坛春草余

玄览堂

𩑦𩑦游气运森森万有罗窅然玄中求理一非有他存心冥灵府洗胎濯百邪众妙

体常寂岂知形迹多譬彼明月轮总揽诸山河团团霄中澄默默至幽遐又如大海渊潜凝韬众瑕中有径寸珠炯炯曜玉葩间黑归明月应感无偏颇高观众甫表不乐将如何

由竹溪至梅溪偶成（途中）

出门懷清旷入舟若炎炽皇天从人欲飞雨飒然至风吹波上寒凄其感秋气暝投山僧眠复得清净地舟人候明发徒侣不得迟泝流多杜渚篙楫颇告瘁虽微三巴险事与五盘异闻昔天目顶灵物久潜閤一朝赴大壑怒折崖谷碎回头顾其儿首尾屡相值至今此溪水斗折七十二世遠众喧传茫昧竟谁识但欣秋涛壮水物俱得志我何惮行役沿洄领佳致鸥鳬泛淡濫菱蒲蔚苍翠人烟乱余集茅屋若綦置之子住河濬相望劳梦寐每怨川无梁握手今可跂忆昨访我初茅垞夜深闭扣门满衣雪僵立不得跪移灯具鸡黍浊酒寒不醉同来郑广文清瘦凛欲睡絕胜王猷翫返棹何太易兹行冒暑雨古礼尚报施逝将■〈木羲〉轻桡待子思共济散发乘长流垂竿钓清泚虚舟摠超越万里谁能系恐此未易期临川一长喟

题席上墨萱扇

团扇复团扇团团三秋月上宜男草可翫不可折宜男何足贵能令忧作悅忧思既可忘为君忘炎热无障西风尘污此皎如雪

赠医士刘子中

伯休无二价长房惟一壶真隱不在山何必去京都通籍游金闺观化眺神区搴萝采石肉潜波揽江珠焚香降天老稽首皇农书制之轩光灶湛然龕秽除含精就日养辅世事其余起遥龟鹤年高眄凌桑榆哀哉仓扁徒忘己要名誉当年不自保千载回翳如

观习礼神乐观归时有作

维皇恭明祀卜郊时再阳指期戒先事习吹诵故章竹宫俨清閤羽佩溢中堂莚阶罗舞钺着位表官行升歌出睿藻妙奏发清商胪音速遠响华钟泛高张虚壘待实醴荐璧愿承筐想兹天步临穆若垂景光骏奔贵有恪报说永无疆岂同交门享悦惚事神方揆余承人乏具寮慚奉常兹焉陪羣彦会此灵時旁执礼素寡术敕躬何敢忘愧无安世歌徘徊望斋房

赠胡若海

胡叶两才子束发好从戎弃书去学剑联翩行伍中论兵舌吐火见敌耳生风连镳度狭邪接席醉新丰万里逐轻车十年无战功归来投文吏相顾各成翁知命故无怨为儒岂不通聊复释短褐从兹事章逢君恩承见收吾道未终穷乘轺九真界策马三晋冲一身随简书分散如飞蓬严秋九月天握手此相逢垂杨欲生肘浩气犹填胸却话向来迹恍然醉梦同一赞少昊司出入蓬莱宫一佐青阳宰弦歌百里封人非鸟兽羣焉得长相从换酒金陵市分袂新亭东高歌清骊曲咲拂寶剑锋致身贵勋业泣别非英雄石城接秋浦九华应茅峯欲寄碧云句中有双飞鸿

人闲

人闲白日静鸟鸣高枕余阶筠初过雨窓风时弄书已无车马迹适似田家庐即此何足恋性自乐幽居

雨中试笔

门径素来静雨中人更稀山禽时一啜田雉每双飞客散罢琴宴心闲清道机南山有佳色相对共依依

山中送悟澹隱君还蜀山

春山有佳趣累日同游寓我为采薪留君先拂衣去竹翠落闲阶莺声出高树空馆愁独归依然携手处

懷旧

我有一区宅寄在匡庐山香炉起户外瀑布落檐间梅老花空发草芳人未还恰有藤萝月夜夜照松关

夜坐

闲门催闭早日落古垣深移床傍秋草对月闻高砧角巾清露气华觴淡夕阴毋言怨遥夜幽独故予心

独夜闻雪

亦知雪意就向夕足寒云茅山夜自掩孤枕梦回闻暗飞方瑟瑟睡起看纷纷却忆
梁园客既醉复能文

雪后

夕齐众禽欢残阳照山雪徒令扫幽径依然人迹絶綠尊时自命寶书谁共阅默默
待归期故园宁久别

郭上舍读书处

虫鸣县斋晚月满杏花坛散帙夜方半下帷人独寒屡看孤烛换讵闻清漏残拥衣
待中旦杂佩已珊珊

寄金许二文学

轻维始扬幙新篁稍（阙）林非关杜来迹苔径自无尘独以静为赏弥懷心所亲
倘毕东皋务一来存故人

题春山瑞霭画扇

莺啼山雨歇前川綠正繁人家在深树鸡犬尽无喧澹澹流水意依依田父言即此
堪结庐可以傲华轩

松竹轩

曹务局终朝斋居暂休沐松阴生昼寒竹色连苔綠懒从醉吏喧时对高僧宿毋将
簿领来移此山林躅

潭上偶咏

回涧曲如月泠然綠树根云山自幽寂水石共成喧静观因悟性耽听欲忘言何由

驻尘驾迢迢一寻源

寓徐给事宅观旧所植竹树怆然有懷

君为金门彦我向故山来芳树遶庭綠犹是去时栽寝阁铺余馥宾位满青苔孤赏谁为乐园花空自开

题采苓子卷

春山霭众綠灵苗何处寻孤芳不自掩迢迢入幽襟褰条繁露散濯根寒涧深持此当朝茹潘斋延道心

送莫文（阙）入郭却还溪居

举世皆如醉何人独爱才余虽识君者相对亦徒哉落日收书卷凉风送酒杯纷纷俗中恶空谷迟重来

蝉鸣山郭晏一棹出烟扉凉风将皓月迢迢送君归自识门前树遥闻窓下机应叹緇尘满临流一澣衣

雨夜

寝阁去门遠春雨荒园夕谁谓在人境宛似空山客禽归暗竹喧风断疎钟寂戚戚寡欢惊良宵端可惜

雨后望西山懷子

竹色悅朝雨鸟鸣人正闲手持白羽扇遥咏西楼山企彼巢居士高卧石林间团团青桂树岁晏待予攀

舟中望佛灯精舍懷南洲长老

荡舟西陂上望山懷遠公遥知覆衲卧雪屋一灯红事殊迹暂旷神交理自通维当待岁杪期子白云中

晓起

新寒人独卧寝扉风自开向无羈旅念秋思亦佳哉曙禽翻暗竹白露泻青苔欲赋幽居意对景每难裁

过白马湖

沿流信归棹渐与青山遥遥见鷗鷺飞靡芜春尚浅空嗟心爱离莫缓愁肠转不对芳尊酒纷思终难遣

纪行诗

洪武十五年腊月奉旨乘驿往鳳阳祭皇陵舟中作

龙江湾

玄天无烈风江水日夜清驰波渺东注回流抱神京至哉鍾水德乃以龙为名舟檣万方合雄丽殊百城昔云天塹险今为衣带萦山川迹不改人理有代更下马入官舡兹焉始孤征祀事有常期中心念王程俯视万仞渊不啻沟洫平涉川古所戒事重躯命轻

观音山

连山争南驰划断沧江曲势如万马奔鞭■〈革登〉忽回复石角不戴土苍然四无麓寸草不得荣唯含古苔绿浪波撞其根岩窦响琴筑浮图乃善幻凌虚架佛屋行人愿利涉望拜各致祝人生贵心事安能虑存覆我欲升其巅憑高快心目飞传不可留一往如电速

竹筏

冻雨不成雪客（阙）利新晴回睇三山外残阳霭余明江神不扬波归流淡且平使者诚宣德国家有威灵笳鼓发中州棹讴悲且清酹酒凌长风篇翰脩已成尝读皇华章征夫任匪轻愧无咨諏効何以答皇情

金山门

两山夹沧江拍浮若无根利石侔剑戟风涛相吐吞维天设巨险为今国东门试将一苇守坚若万马屯我来及清晓天空霜露繁列宿森在水北斗若可援江光合海气溟滓神理存俯视不敢唾中有蛟龙蟠浮屠者谁子高居凌风旛不见渡口人扰扰蜂蚁喧愧彼超世士去去将何言

■ 〈干𠂔〉沟

衰杨夹高房北风暮飕飕随逢长老问会言是■〈干𠂔〉沟相传开凿初民劳天为愁至今浊河底时见白髑髅陆通梁宋郊水漕荆吴舟渠成万世利虑始难为谋至今南北交此土为名州飞阁跨通波张幄如云浮忆昨少年日宝马珊瑚钩经过剧季犇结把金张俦醉月琼花观征歌明月楼罗绮朝还暮笙竽春复秋繁华逐逝水一往不可留向来歌舞地茫然狐兔丘家老无儿孙杖屨驱羊牛少小心尚尔不知今白头欲从乱离说恐子增离忧长揖入门去客泪如丝流

高邮城

茫茫高邮城下有古战场当时奂盐子弄兵此跳踉燕师扫境出供馈走四方长困西百里旌甲耀八荒势如泰山颓一卵安能当骄将存姑息顿刃待其降两机不容髮岂暇虑杀伤一朝谤书行将殒兵亦亡喑哉三里城百万莫与亢鹿走命在庖终然属其王空余菩萨台落日风沙黄

清口

豁达两河口前与黄河通高岸忽斗折清淮汇其中甘罗城在南韩信城在东一为秦人英一为汉家雄人生有不死所贵在立功方其未遇时鹿鹿何异同时命苟未会丈夫有固穷舍舟登高防岁暮百草空坡陀陇畝间一二老病翁遗迹不可问但见荒榛丛行行重回首目断以飞鸿

龟山

轻舟泝淮流千里不见山披衣起清晓忽覩青孱颜始觉客愁散顿忘行路艰安得策飞筇一造幽人关翻思在山日千岩仄登攀物少乃足贵不在（阙）恶间役夫告我

言此下栖神奸嘘气成江河须臾驾冈峦僧伽大威力困彼一鞠慳石岩下无底系以千
连环至今风涛夕犹闻响珊珊茫茫淮泗流禹功不可刊传奇乃善诳此语当重删作诗
纪岩石庶以开愚顽

三江口望京阙

凋年赴陵邑穉景懷京阙引领鵷鹄观言归桃李月綠芜满芳甸青山丽佳节沙气
已含眇柳意方辞雪征夫方迹止同心仍阻絕迢空庶无遗赏胜聊自悦吾其和天倪将
从庄令说

题云山图八首

烟霏乱晴旭遥见西林山忆归东湖遠人家春树间荆扉映水掩应待龐公还

坐爱西山翠手版方支頤白鸟逝如彼孤云淡若斯谁能闲料理空滞还山期

郢水不可极荆门望渐微青山将落照偏映酒家扉渔梁夜争渡知是醉巫归

潮落寒沙广苍然遠山暮何处罟师归自识门前树披图忆所歷仿佛松滋渡

参差綠树短窈窕花源明白云若可揽山鸟时一鸣遥羨中林子迟迟南涧行

猿啼楚山晚云生冒洲渚返照入澄江风吹半峯雨中有遠行舟悠悠待徒侶

寒烟遠轻素斜日在高峯但闻猿鸟响更无尘土踪山僧暝投寺迢遞来清钟

南山隔秋水秀色空在眼褰裳不可涉临流思无限孤舟肯相济宁辞去人遠

题松下读书图

幽栖出尘表空翠连松竹袖得碧苔篇闲来石上读日暝欲忘归山空人转独（浔
阳张羽题吴兴莫翥所畫松下读书图奉赠正卿高士）

登桐坞后岩

牵萝陟云崦憩此盘陀石欲去更题名淋漓薜花碧定有樵夫来恠是龙蛇迹

山中答武康徐高士寄书

久别得君书开缄散吾虑不寄山僧来何由知我处剪纸答君书还寄山僧去为问片云间何时一相遇

暮归闻许文学枉顾怅然有懷

留连东斋饮迢迢独归迟忽逢山媪话知枉故人期月华窗上动禽响竹间移不遇君闲咏悠悠清夜思

续懷友诗（并序）

予在吴围城中作懷友诗二十三首其后题识者四人则嘉陵杨君孟载介丘王君止仲渤海高君季廸郟郡徐君幼文也时余与诸君及永嘉唐卿者游皆落魄不任事故得留连诗酒间若不知有风尘之警者及兵后移家武林向所懷廿三人往往而见而五君者或谪或隱各相睽异叹离合之无常感游从之难得作续懷友诗五首

余左司

幽居古垣下共彼嘉树阴比邻岂无好念子是同心芳英带露折清尊向月斟欲往寻遗躅荒园春草深

杨典簿

藩翰屈长才蹉跎事文笔宾筵罢醇醴容台淹下秩高门去后静孤帆望中疾少别岁已华思君无休日

王逸人

衡庐古巷中高驾日相顾芳草掩空扉知君断幽步残烟北寺钟暮雨阖门树携赏邈难期庶望遗緼素

高征君

予既迁山郡子亦返郊园两地花俱发离愁春共繁已罢临池赏仍睽倾座言从来作者意寂寞向谁论

徐军咨

常懷稚子悲复洒佳人泣草草从军旅悠悠去乡邑芳郊连骑行烟郭同舟入当时苟不乐追欢何由及

题倭扇

赐从天苑秘来涉云涛遽入握体还藏向风机自展岂无白团扇能舒不能卷洗马手中持终朝陪鳳辇

过云居精舍

逶迤广前峯到寺行屡歇垒庖竹外烟汲路松间雪观水悟真源闻香解禅悦欲共老僧言相对还无说

拟过园隱阻雨奉还

在遠每伤离在近还成隔飞雨渺何穷佳期怅难得人寒市井空天晚江湖白知君掩阁卧终朝迟来客

雨中偶成

空斋自潇洒况复值秋初焚香对微雨如在古僧居庭寒夕鸟下烟淡暝松疎知君寫诗处高情方似余

石门道中得石字

依微鸟外村逶迤烟中驿帆重因愁雨柁转时惊石遥岑树共青遠浪鸥同白离索

诟湏愁来往谁非客

迁居懷沈都事

岁晏共依仁孤舟泊烟麓以君吏隱地息我静者躅家贫乞假多情狎儿童熟留滞
连冬春遶庭芳草綠开尊对疎雨悬灯照深竹谁知今夜别独掩高楼宿

寄中竺泐季潭

师从钟山来遗我故人书一入白云去相思秋雨余徒慚尘土迹未歟竹林居遥想
中峯月清楚满空虚

晚归饮众芳亭得高字

晨登郡峯首良游舒郁陶褰衣陟萝磴停策眺兰皋崖端俯城肆树杪瞩归涛洞平
遠帆驶天净羣山高旷望信多美喧浊暂能逃况值芳尊酒一酌解疲劳

钱方贞外力疾归吴兴省墓便还钱塘

终年不出戶出戶即相违疾病欣在告田园应暂归天寒孤舟发岁莫行人稀棹师
遵旧路田翁识故衣望闾桑梓在入里人民非伤哉展丘墓遽尔辞荆扉还乡如过客回
首情依依晴春入旧腊积雪含清晖佳期迟子还勿恋故山薇

蓼莪堂

种莪图可茹养儿欲代老莪生化为蒿儿大不相保忆昔儿初生长育恐不早儿羹
未及尝亲骨已枯槁譬彼种莪人爱此颜色好岂不勤灌溉采撷思一饱宁知不入口埋
没同秋草诗人感兹义哀哀向穹昊堂中有孤儿千载共忧抱我愿天下人有食奉翁媪
为莪不为蒿庶免负遗懊

答方以常雨霁见寄

余方卧闲馆子亦辞公门岂惟名迹同中有素心存昨莫枉高驾飘飘寒雨繁觴酌
未云洽烟郭遽成昏乖旷积经宿已复长忧烦晨兴束方翰知子憩幽园庭阴綠始遍时

夏鸟无喧感物心独悟思与静者论被时想清景欲往阻修辕申章酬佳贶寂寞已忘言

咏懷答宋天章

良辰谁不乐游子独慨慷慨慷亦何为感物懷故乡故乡乱庶已欲往川无梁安得晨风翼馱彼西南翔出门遇行客言曾歷我疆宫室尽为墟城郭徒悲凉访子平生亲白骨委榛荒君子志四海小人懷一方勋名愧遠图岂必梓与桑游子不能答涕下沾衣裳叶落粪本根狐死首山冈所生良可乐贫贱乃其常

岳王坟墓

中原千里志西湖四尺坟长城忍自壞神器理当分流血应为碧湮背漫成文魂魄谁相友涛江有伍君

元日喜雪懷方以常

片片逐年来皎色映楼台坠花惊爆竹落素混香梅邊杯春宴里扑马早朝回应知洛中客高扉犹未开

经德寿宫遗址

废苑民侵久故迹理当微鳳础埋将隱鸳瓦坠应飞輦池逢折佩薶草得遗玃西陵亦如此神游何处归

题赵彦征作弁山卷

济济清朝彦亭亭琼树枝世胄难可保零落遽如斯朱门亦已仆墨沼淡无滋空余图画迹永絕人间期虛名知何益冥寞有遗悲抚卷一长叹想子平生时

山居书志

旅寓难自遣幸此竹林栖石苔饶古色山禽多夜啼遗形暂尔遣望道甯然迷鬱鬱将谁语申章默自题

偶咏一首

天寒院自幽客散人逾独呼儿掩书罢步庭玩苔绿非怀高世心为爱山中宿

古诗三十二韵奉寄兰室居士袁省掾

吴兴袁居士弱冠为吏师鹿鹿三十年起身遭乱离是时边兵骄杀人如刈蓍召吏掾幕府狼狈不得辞军门日斩斫劒戟风差差虽有幙中宾俛首莫敢窥掾曹职虽贱不畏虎豹姿论囚不当律不肯书狱辞长兴本属土咫尺为边陲居人私往来互市各相资边吏要功赏诱敢遭拘累诏言犯我（阙）羣然送圜扉将云罪当斩掾云罪当捶师律公所守吏议我所持此本无辜人未尝战交绥死者不可生安得恣芟夷不然请杀掾不能相诡随箝纸不令署抗言动旌旗将威亦少解往往免为尸从容抱案下一军为之危事过不言功但言职当为直声撼大府加官升左司归来田野间婆娑鬓如丝乱世身独全家有两孝儿当时共事人窜死吁可悲天道当与善此语不吾欺岁久恐埋没高义无人知我欲为纪述传信不传疑请君细记忆追录休阙遗所活几何人主名复为谁新春幸緘来此事匪我私虽微良史才要为来者规

答陈传大见寄

鸟鸣何嚶嚶伐木久矣缺君子遗古风故人心未绝贻我新诗章问我间何阔置之衣袖中三日诵不辍比以琼瑶花要以金石节岂无蕙兰花可以慰离别君怀多芳草所思在离别惟有皎皎心思君如明月

赋得曲院风荷赠别

露叶漾涟漪风凉水院时翠轻愁欲断珠圆不自持低昂随芰盖翩翩卷钓丝盘折惊鱼游规荡宿禽疑为语莲舟女聊将赠别离

题琅琊亭

遥睇环滁秀乃升琅琊亭吊古易为感忧怀从此兴山川景如昔草木通衰荣泠泠碧涧泻冉冉凉飙生当户猿狖啼出谷莺鸟吟登临且酣咲何用劳吾形企彼贤哲士千载有余情

风雪图为巨上人题

苍茫云气昏咫尺同万里白雪飞满空柳絮应堪比豺虎亦敛迹何为赤行子扁舟蓑笠者岂不寒堕指独有林巾僧禅定因初起焚香坐虚室松窓时暂倚一瞬天地间如在琼瑶里

静居集卷一

●钦定四库全书

静居集卷二

（明）张羽 撰

○七言古风乐府歌行长短句

题沈氏宜春堂屏风徐给事贲所画春云万嶂

休文堂前花满枝风物四时春更宜前年三月宴客时传觞击鼓但恨迟坐中才子姑苏客众里翩翩好颜色醉来意气为倾倒千里江山出胸臆寿屏十尺色且鲜千嶂万嶂含春烟客子疑行灞桥路人家似住武陵源山僧投寺乱松里山下鸟啼人未起关门日出金琐开双堠平临楚江水江水湘云互蔽亏渚宫遥隔望霏微东崦晴垂西崦雨何处长歌樵子归亭下流泉春浩浩上有居人往来道相过总是看山人衣冠各别心事好主人爱说不下堂清晨扫地坐焚香晴日似见孤云起莫对疑闻涧草芳夫君生平于我厚记得新诗长在口长干一去无尺书漫对此图嗟妙手一行作吏此事废从前（阙）癖今除否遥知紫陌红尘下每为云山一回首人生适意在杯酒浮云万事亦何有君乎何日归去来雨里青山待君久

昼云山歌

我昔曾游庐岳顶欲上青天凌倒景山中白云如白衣片片吹落春风影云晶晶兮花冥冥万壑送尽洪涛声欻然置我沧海上金银楼观空中明上清真人咲迎客夜然桂枝煮白石手持凤管叫云开虎咆龙吟山月白明发邀我升东峯导以绛节双青童天鸡先鸣海日出赤气照耀金芙蓉屏风九迭花茸茸雾阁云窓千万重胡不置我丘壑中一

朝折翅投樊笼空留万片云挂在清渡千丈之寒松愁来弄翰北窗里貌得云山偶粗似
遂令残梦逐秋风一夜孤飞渡江水梦亦不可到图亦不可传不如早赋归来篇仙之人
兮待我旋安得齷齪尘埃间坐令白云摧绝无与归青山咲我凋朱颜

寄生碧桃花歌

少年惯作看花客陌上桃花搃相识春风一向此中偏一种花开千种色只爱深红
间浅红君家此本更不同枝上白云吹不散阶前明月照疑空一从一衡根各别香土斜
封愁欲折西筵红（阙）人半醉忽见此花惊是雪武陵秦人那得知河阳满县徒尔为
当时春风千树锦未比君家瑤树枝翠禽欲来愁易见蛱蝶栖时难可辨红妆美人娇如
花着向花间应掩面花今正开莺乱啼酒醒拈笔为君题羨君兄弟如虹蜺豪饮不愁花
下迷玉壶清酒金偏提秦筝琵琶羌管齐走觅桥西旧酒（阙）莫待风雨花成泥

题徐给事画

黄门给事三十余面如红玉少有须风骨岂是山泽癯问着只爱山中居前年版下
鹤头书征起直上青云衢文华堂高凌紫虚出入侍从陪金輿排方小带红罗襦精神宛
如冯子都朝下手帖八尺笈左旋右转风生躯有时自臂双雕胡命中迭发争讜呼归来
宾客满直庐京城酒贵不住沽烂醉坐比苍头奴执烛寫此云山图方今台阁多文儒似
君才艺众中无文官侍中武金吾不负堂堂美丈夫山中故人交不疎十年贫贱长相俱
升沉忽如鸟如鱼麋鹿岂与羣龙趋见君此画长嗟吁关西行李今何如祝君名成归五
湖来寻高阳旧酒徒不辞解衣贯玉壶与君重醉黄公垆

米南宫云山歌

古之画法不复见六朝人物留遗谱后来山水出新意二李三王差可觀洪谷之后
有关仝营丘浑雄独造古华原处士笔奇崛余子纷纷何足数郭熙平遠疑有神北苑烂
漫皆天真画院宣和众史集俗笔姿媚非吾伦岂知南宫迴不羣一扫万古丹青尘神闲
笔简意自足窈窕青山行白云黄侯黄侯安得此元气淋漓犹满纸晴窓拂拭对高秋恍
惚神游华山里生平画癖奈此何为子试作云山歌珍藏什袭君须记世间名画今无多

题画云山图

余既为公衡作此图公衡复求余诗其上遂为赋此时洪武丁巳八月十九日也此

画遗逸在茗城

前代何人画山水长安关童营丘李华原特起范中立三子相望古莫比亦有北苑与河阳后来作者谁能当米家小虎出逸品力挽元气归苍茫房山尚书初事米晚自名家称絶美艺高一代谁颀颀只数吴兴赵公子当时弭节匡庐峰曾寫太平兴国之神宫五峯却立疑争雄台殿突兀分青红中有云气如游龙我对此图卧三日顿令奇气生心胸乱来学士遭漂荡文艺草草谁为工笔精墨妙心更苦安得再有前贤风呜呼乾坤浩荡江海阔使我执笔将安从

寄题天目山房歌

昔卧香炉顶（阙）观山海图东游拟拂华盖云下瞰弱水窥蓬壶天公有目何不在天世传寄在兹山颠两泓碧水涵霜镜炯如双瞳落天边天高听卑视亦宜然云有十二清虚之洞府珠宫贝阙不可睹灵风飒飒卷飞雨危石深林人上苦盘涡转毂若雪山青天际际响天鼓龙藏其中是耶非但见神鱼作人舞慎勿戲之逢彼怒顷刻滂沱泪下土前年南昌仙邀我望山雪神宫玉女待我来欲往从之路超越若人有仙骨居与洞府邻双童耕云种瑶草石田自熟无冬春卧处烟霞飞枕席醉里山花落酒巾松风萝月朝复暮坐见麻姑白发新我欲驾白鹿共子攀云岑请天开两日照我一片冰雪之清心但恐此目不司视如星有箕斗不可簸与斟且复临泽漱金碧听我长歌金石音不然倒却池中水酿作百斛之春酒共君酣醉卧云林洪崖举手或相接更结丹梯千万寻

为童文学题韩介玉画

我识河东老词客鹤骨伶俜长八尺白头徒步拾八侯人生变化谁能测将军跋扈天为倾公持寸管力与争当时直气动朝野至今文采传诸生诸生白面今已老三载渔官空（阙）倒罢归百事无所为万壑千岩恣挥扫丹丘玄圃落眼前涧水松风鸣浩浩由来絶艺出天机俗吏纷纷争丑好吴兴博士今郑虔故山未归雪满颠今年召对席屡前蒙恩亲赐水衡钱归来见画心茫然拄杖欲问金华舡金华之洞小有天下与五岳相钩连初平炼丹去成仙弟兄相随风翩翩洞前白不如羊眠我欲访之何由縁安得与子相周旋饥餐紫芝拾瑶草石上一咲三千年

余将军篆书榻本歌

余将军守舒州舒州之城大如砺长江西来遶城流贼船如云压城礮将军提剑坐

城头劔未动贼已奔鲸鲵蔽江江为浑孤军六年二百战王师不来城自存无兵犹与战
无食安可支岂无爱妾与爱马杀之不解壮士饥力尽（阙）竭将奚为仓皇齬舌骂不
已义士三千同日死只今犹有尽忠池碧血清冷化为水将军持节东州时作此篆书形
崛奇妙墨已随神物化好事当时临得之虽非其真意独在垂金屈铁蟠蛟螭我拜重是
忠臣迹秦相虽古其人非呜呼将军此书配者谁请君摹取浯溪石上中兴碑

题徐士元画夏木图

董元夏木不可见俗本纷纷何足观徐郎笔力能扛鼎寫此千章生昼寒阴森似有
神灵会偃蹇直作蛟螭蟠天鸡晓鸣清籁发木客夜度云旗翻林下文人行杖藜石根叶
落失旧蹊孤童幙被向谁宿山风萧萧日薄西商岩紫芝复何有武陵桃花元易迷人间
■〈彳 顷〉洞不可处莫畏虎啸兼猿啼（原作商颜紫芝不可食）

赠疡医宣氏

长桥下压蛟龙宫岸上人家如镜中道人卖药临溪水医得青蛇是龙子报恩不受
千金珠龙伯亲传海上书门前扶杖人如市妙术何愁三折臂燕支山前白草秋冷入金
疮泪欲流安得神丹从尔乞提携玉龙还向敌

赠倭翁

东夷来语嗚呼圣人当天九有服小臣蝼蚁将安归万夫伐竹扶桑浹夜搗水苔成
侧理制为鹄尾扇参差再拜献入金门里君王垂衣坐法宫天飏（阙）清秋同尚方受
献应无用分颁徧与羣臣共朝下从容冰井台人人襟袖南熏动倭翁来东夷平扬皇风
四海清

题遵道墨竹歌

墨竹昉自何人始辋川石刻今余几后来萧悦稍出羣香山侍郎独称美洋州太守
善寫真长帽先生差可擬江南谩作金错刀枝叶离奇何足齿北方作者夸澹游房山继
之妙莫比湖州公子最擅名同时亦数蓊丘李蓊丘有子能传家笔势翩翩此其是一竿
玉立无因依风露淋漓犹满纸想当涂洒发幽兴静对山僧北窓里江湖无人老成尽百
艺荒凉今已矣展图三叹墨君堂秋声满座悲风起

题沈御史所藏倪云林竹并竹枝歌

云林之子有仙骨平生好洁如好色纷纷浊土等虫沙呜呼瓚也何由得忆昔常登清閤堂黄金寶鴨共焚香（阙）京妙墨僧繇画示我不啻千明珰人间万事如飞电洗玉池空人不见李子城东土一丘何人为着黔娄传绣衣使者骑青骢曾听竹枝湘水东归来见此如梦寐巴陵洞庭生眼中江湖豪翰今零落君厚此图良不薄愧我题诗忆故人黄雀何年下寥廓

望太湖

登高丘望遠泽蓬萊三山不可測何如太湖綠万頃洞庭连娟向空碧东风吹尽吴天云玉盤双螺翠堪摘我昔东游鳳凰台嵯峨巨艚如山来白波不动镜光晓云帆万点争先开中流回首心茫然恍如乘云行九天惊涛忽逐回风旋砰雷转轂若雪山龙伯鬼国见眼前失势一落充蛟涎舟师指浪呪浪婆我独再拜不敢言平时之险且如此何况震荡洪荒先帝尧咨嗟逾九年黄能无勲幽羽渊有子大圣与天同一朝出我羣鱼中试观此湖险始知四载功如何草木华无心谢春风吴越之事良可鄙虎战龙争方未已水犀百万今安在唯见夫差白云里鸱夷身退不言功不直湖中一杯水我欲临流叫神禹湘娥鼓瑟冯夷舞尽挽湖波变春酒醉卧扁舟弄烟雨

题胡廷晖画

画师我识吴兴胡身長八尺苍髯须目光至老烟不枯藻绘万象穷錙铢大儿十岁能操觚小儿五岁能含（阙）得钱不共酒家需时复纵博为欢娱魏公家藏摘瓜图妙笔不啻千明珠胡一见之神（阙）苏以指画肚潜临摹落笔便与前人俱祝融撑空阁道孤朝云暮雨相萦紆中天碧瓦仙人庐下有桃源风景殊鸡犬似是先秦余浔阳山客山泽癯自从丧乱遭穷途幸逢治世容微躯尧舜亦有巢由徒已办小艇长须奴便欲往从渔父渔江湖此境何地无（赵文敏公家藏小李将军摘瓜图歷代寶之尝命廷晖全补之廷晖私记其笔意由此画法大进故诗及之）

题青并云林图见前不复录赵彦征画葵轩歌为金修撰赋

昔君种葵吴门东南风五月花茸茸年年走马看花去君家有酒如花红（阙）君种葵荆山下五月开花还遶舍看花对酒岂无人祇忆故人无在者种花人在未成翁何事看花人不同我亦当时看花者忽到花前如梦中握君手为君寿但愿长看君花酌君

酒

驿船来

驿舡来鼓如雷前舡去后舡催前舡后舡何敢住铺陈恶时逢彼怒画屏绣褥红
■〈毛瞿〉 穠春梦渐醒过舡去棹即长跪劝使臣愿官莫喜更莫嗔古来天地如邮传
送尽忿忿无限人

梅花初月楼歌

吾闻仙人好楼居乃在阆风之圃玄洲之墟云窗雾阁千仞表青天十二金芙蓉风
舟不可以径度安能跨海骑鲸鱼新安先生列仙儒卜居半生茅未诛晓携青鹿向烟雾
一径初入千萦纡桃源忽向眼中见风物但是秦人余五丁何年斧凿枢洞户夹立宁平
舒纷纷过客不敢有山君守护烦呵嘘先生结楼万木杪迥如丽谯雄且孤连峯忽断西
南隅开楼见月蛾眉初梅花千树雪不如飞觞醉月弄花影炯然身堕白玉壶侍郎结髮
读父书十年闭楼山不看一朝征起青云衢佩玉日向君门趋楼前梅花自开落楼头明
月还盈虚南窗孤烛照归梦觉来枕席非吾庐且当致身佐唐虞夔龙岂容混樵渔长干
美酒熟可沽梅花如雪覆绿芜神州月色天下殊何用区区懷故都花间卧月红■〈毛
瞿〉 穠人生花月何处无

题钱舜举溪岸图

忆昔至元全盛日天子诏下征遗逸吴兴八俊皆奇才秀邸王孙称第一一朝玉马
朝周去诸子声名揜辉赫岂知钱郎节独苦老作画师头雪白江南没骨传（阙）稀钱
郎得之法更奇晴窗点染弄颜色得钱沽酒不复疑今人祇知重花鸟岂识此图夺天巧
玄云抱石雷雨垂苍山夹水龙蛇遶岸侧溪回共杳冥蒲稗深沉映鱼鸟渔舟乍随迷烟
散客子竟渡澄江晓白云布置师北苑只恐庸工未深了卷余更有魏公题字拟锺王差
未老郑侯得之恐神授使我一见喜絶倒双溪流水清何极门外南山空黛色文章翰墨
何代无二子畴能蹑其迹为君题诗三叹息呜呼古人难再得（吴兴当元初时有八俊
之目以子昂为称首而舜举亦与焉至元中子昂被荐入朝诸公往往相攀附取宦達而
舜举独齟齬不合流连诗酒以终其身故二公之诗各言其志而子昂微风有意览者当
自得之也）

题陈升画马

开元之中马独盛秦汉以来难及之岂惟监牧効才艺画史往往称神奇拳毛玉花最难寫祇许曾羈名当时亦有弟子沙苑丞不解骨法空毛皮近代吴兴赵公子雍也其子名相驰后来陈升号入寶升今已老继者谁青桐飒飒凉风吹奚官朝出试马时前者回顾后者随精神不动鬃毛垂唐家四十三万匹如此骏骨亦恐稀呜呼世间駉骀方满地安得覩此真龙姿

题徐士元所画（阙）面

营丘老山百世师后来学者有郭熙寒林平遠世岂有往往贗本传其疑吴兴徐卿好心手貌得郭熙定真否二三野人长松下茅屋正对青山口前者回顾后者恭抱琴伛偻随孤童世间岂复有此辈定是栗里柴桑翁请君更试虎头笔为寫我象叅其中

题幼文为费景祥寫古萧山寺图

山人手持酒一卮长跪向我求新诗自言此（阙）君所识乃是河南使君之所为（阙）厓怒瀑形絶竒天门阁道相因依中有台殿横天梯金绳碧瓦光参差使君当年作此时祇是昂藏一布衣豪雄意气今已（阙）图画应知得者稀右丞辋川不易得此公名位岂卑微请语世上悠悠者人生贫贱安可欺人生贫贱安可欺

浔阳张羽为景祥题是日积雨新霁风日清美余与野得黄君公衡沈君携酒会饮其家酒酣耳热率尔赋此不能工也

画山水行题沈子干所藏赵待制江浦归帆秋林潇洒二图

古来名画传父子唐有二李蜀两黄吴兴公子冠当代雍也继之早擅场太祖子孙尽龙种毛骨固是非寻常珊瑚寶玦久零落空有妙艺传文章至元天子亲召见徒步便赐中书郎奏园每得天颜喜盛以金匱白玉堂遂令世人争贵重门户杂沓如堵墙雍初腾蹕晚一（阙）五陵豪气无时忘吴姬越艷坐相拥始（阙）落华挥缣緌五日十日一水石屏障仿佛生辉光君家双图何所得私印乃出牟陵阳一图汗漫秋水阔客子喜甚高帆张山僧暝投云际寺殿影洸漾涵潇湘一图翠峯孤峯起空林叶赤天已霜蹇驴乌帽喜萧散侣是汉代绮与黄风尘瀕洞二十载锦题玉轴多散亡图书祇应天上有人间那得千金藏从来好事多成（阙）云（阙）过眼如毫芒君不见王家相家势尽时复墙走轲不得将何如城南佳山水千崖万壑摩青苍与君对此饮美酒虽无南宫北苑

吾何伤

题姚运使寫溪山仙馆图歌

去年君为郡文学独抱遗经憎命薄出门无马坐无毡拜迎官长常作恶今年君为转运使殊恩亲出官家赐月给太仓三十斛况复官闲少公事人生贵贱翻覆间世上悠悠那解此忆昨访我当严冬寫此溪山三数重骅骝一去了无影空有遗迹泥沙中闲道河间古城郭出门遥见滹沱水何如为画古邯郸珍重函封寄千里

去年冬姚君继华过予戴山寓舍会饮顺德堂为仲伦寫此图今年春遂为文学征除河间运使秋八月张羽赋此

题唐子华云山歌

国朝画品谁第一房山尚书赵公子二公何以能絶伦丘壑乃自胸中起由来书画搃心画政自不在丹青里当时岂无刘与商屏障纷纶何足齿唐侯自是吴兴秀爱画彷彿郭与李长松平遠早已工更上歙州看山水归来却师董北苑叅以房山势莫比始知絶艺老更成画师俗辈那知此此图三尺谁为赠云气苍茫石魄磊牛羊未归樵子出户牖寥落苍崖底寫成不题岁月字要是头白居乡里乾坤浩荡江海空后人未续前人死为君题诗三叹息世上好手今余几呜呼尚书公子不复见得见唐侯斯可矣

题王元章墨梅

王郎志奇貌亦奇与世落落嚙莫施一朝骑牛入都市关吏不识谁何之归来老作会稽客千戈歙起西南陲青袍白马风尘里越州城边战不已雄襟自许鲁仲连一箭无成身已死世上空余寫墨花只将名姓华光比呜呼人生有才不尽用古来埋没皆如此

题便面

近代丹青谁第一南有魏公北有高风流雄混各臻致下视刘商儿女曹百年零落作者少大夫文艺供草草山川英气何代无我总有心嗟欲老君不见房山翁曾寫太平兴国宫五峯秀出青芙蓉云气郁郁如游龙千金拱璧不可博一朝焚弃随飘风世间神物久已化纷纷粉墨何由工呜呼乾坤浩荡江海阔使我执笔将安从使我执笔将安从

赵魏公竹枝歌

赵魏公真王孙风流（阙）哲更能文丹青自比董北苑书法兼工王右军至元诏书征草泽召见庭中推第一三事趋朝贺得人万乘临轩赐颜色殿前落笔侍臣惊鸡林象郡搃知名夫人通籍宫中宴儿子承恩内里行一家三人书総好天子频称古来少疏广归来有赐金张芝闲处多章草全盛须臾那可论百年乔木总成尘凄凉故邸属官府零落诸孙随市人空留遗迹传身后一纸千金争买取屏风画絶为谁收团扇书工亦何有唐生购得墨竹枝一尺中含千尺姿若非松雪斋前见应是鸥波亭下池曲池已平台已壞露叶烟丛更何在唯有双溪水北流至今犹遶空墙外

题胡廷晖画

近代丹青谁第一精絶独数吴兴胡魏公家传摘瓜图将军妙笔絶代无年深粉墨纷模糊公命胡也全其污鸥波亭前山满湖宾客不来人迹疎以手画肚私传摹归来三日神始苏下笔直与前人俱今人不见古人画古画自与今人殊呜呼眼前不复见此物吾与购之千明珠

送沈孝廉读书山中

秋空雨洗千峯出霜树遶谷攢青红嗟我欲游不可得子住读书于其中念子出身自纨绮秀如青松茁蒿蓬十年奔走铍羽翮黄金散尽家已空懷中一经不敢弃失此将恐为昏聩束书堂上告父母深山独往无仆童林僧谷叟颇敬客麤床粝食意甚忠身闲昼静百事絶经史左右相研攻径须跨海踏鲸背且莫琐屑笺鱼虫车良路端期不止跬步自可升华嵩业成静俟时自至譬彼力稼遭年丰朝廷悬爵待奇隼掇取五鼎荣而公古来孝悌神所相未必使子羸其躬蹇予少学壮愈惰聪明日（阙）鬓已翁世间有书未尽读安得返老还为童跛鳖何由追駉耳赠子以策情何穷倘有新知遶相教为我緘寄东飞鸿

长洲行送黄茂宰之官长洲

昔我扬帆向东海吊古直上姑苏台洞庭水树净如发一片吴江天际来长洲逶迤覆緑水金沙荡漾（阙）光起不见夫差荡桨归空有芍药似西子阊门大道多酒楼美人如雪楼上头争唱吴歌送吴酒玉盘纖手进水羞劝人但饮不须愁伍员吹箫去国成名鸥夷一去流恨无声要离已矣高坟峥嵘樵儿踰芳草春生何如三让人孤名如水

清亦有挂剑翁生死见交情薄俗轻然诺乾坤长战争两贤不可作令我泪沾纓君发金陵腊未残君到吴门春已还邑人讼少清且闲还同谢眺看青山开元寺里题诗处访我旧墨苍苔间倘过皋桥烦借问恐有高人梁伯鸾

题丘大卿天柱峯

昔闻安期生飘飘入秦京上书三月初报罢拂袖去作蓬莱行却咲叔孙通俯仰咸阳城长生亦何补身后留空名何似长安少年客天柱峯头煮白石朝辞猿鹤下云中莫逐夔龙侍君侧绣衣骑骢马蹀躞■〈足 燮〉台城下爱道心不忘归来坐清夜太平天子亲蚕祭新擢祠官捧珪币紫坛燿火晓如星独倚袞衣朝上帝翻思旧隱地石室生青苔来时壁上苍精剑七星剥落空尘埃丹砂不复化罗衣谁更裁人生穷達会有命何须千岁如童孩草衣木食苦复苦王乔偃佺安在哉寄语空山旧泉石不须为我生悲哀功成倘遂乞身愿万里青天骑鳳来

题赤城霞图赠方生

结髮好名山遨游到吴楚东游不到天台路长忆兴公赋中语赤城焕高霞翩然空中举灵溪碧草春萋萋瀑水和风响秋雨我欲振金策飘飘凌九垓游神不死庭回光增天台手招丹丘人共卧石上苔红颜去人不愿返老大求仙嗟已晚方生去愁人心赠生赤城图吟我赤城吟劳劳亭下一杯酒离愁万里生林阴客车明日当早发云帆孤飞度东越国清寺前千尺松岁晚应归望山雪道逢寒山子为寄相思情未歇山人若欲知我心五界峯头看明月

题山泉隱居图

日长侍立南熏殿圣主从容正开卷内臣如（阙）拥图书诏许近前曾一见玉■〈足 燮〉金题照眼新三王二李（阙）未陈妙笔森芒洄冥漠乃知今人非古人归来三叹北窓下开屏见此新图画流淙百折挂石梁古木寒松势相亚木末何人一草庐山泉之人昔所居鸿胪寺里晚朝下对此高堂心郁紆华亭御湖眼中见武陵桃源路岂殊老夫曾住康王谷五老香炉映飞瀑乱来井臼今存否因尔高歌望黄鹄

日上人深居庵

古槐僧古槐僧何处深居白云里禅心乍可拟虚空世事都将等流水长年禁足不

辞山一日化衣曾入市闲分碧涧浸杨枝戏采青松为麈尾窓间啼鸟寂不闻掌上（阙）珠聊渡尔尚嫌宿习除诗句况肯劳生为妻子古槐僧谁得似

松下问童图

宣和天子开南苑画史当时皆妙选王孙公族总好此精絶谁知赵希遠君不见开元之中世称文宗室亦有李将军希遠师之得其妙思陵寶重（阙）千钧松下何人白练裙萧散似是华阳君展图安得从尔去相侔吹笙卧白云

题高尚书山水

君家此画何由得峭壁阴森如铁色高阁平临烟雾低长松（阙）舍雷雨黑寒绡七尺半是云深林窈窕路莫分幽寻恐与神明遇静听唯应猿狖闻海岳者图絶低小后来作者何足云主人借问谁能尔定是房山高使君

望云树

游子辞亲下江去东游直到海边住水路迢迢难寄书空望白云知母处骆驼桥下贾舡稀吴缙日日得归迟举头见云低头坐此意傍人那得知焚香再拜云中君愿留阿母待儿身

奉化李公复祖母沈年二十生子七月而寡子既长沈为娶兄之女为妇生二子亦寡长公達次即公复二母今皆已老号双节堂

鳳觜鸾胶难续弦双龙镜破难再圆阿婆二十已守节新妇丧夫方少年大儿娇啼母心苦小儿十月安知父破窓风雨来早秋夜绩灯前共相语山头松柏摧为薪山前翁仲二成尘红颜憔悴垂白发生死不慚泉下人

题叔耕画梅雪轩

好画谁如莘枣强堕马折股犹未忘何年寫此寒林趣精絶未数左子王屋里何人坐吹笛似是南昌郡中客曲终朔雪忽飞来开门满树梅花白

松阴清梦图

阳坡碧草秋芊绵疎影堕衣团緑烟龙枝无声山日年仙骨空明神悄然冰魂微回
海山小泠泠鹤语青林表俯视黄尘盖九州岛悠悠凡梦何时晓

百索词

越罗窄袖香如雪五色丝茸相斗结看谁结得丝最长管取自身无口舌大姑巧擘
松纹细小姑双盘作人字揼来只依金钏寬剩得留将系郎臂系郎臂结郎心一寸丝绳
一寸金爱惜莫教容易断直到明年与郎换

吴宫词拟王建题胡廷晖所画春景楼观士女图

馆娃宫中百花开西施晓上姑苏台霞裾翠袂当空举身轻似欲随风去遥望三江
水一杯两点微落洞庭树转面凝眸未肯回要见君王射麋处城头落日欲栖鸦下台戏
折棠梨花隔岸行人莫偷盼干将莫邪光灿灿

楚宫词拟张籍题夏景

渚宫四面芙蓉开碧水晴径水井台玉壶蔗浆光满满当昼君王频赐来云绡半卷
凉欲滑援琴向风弹白雪冷玉屏风十指寒输却鸾篦戲相夺吴绫画扇镇长新肯信年
年有炎热不愿生入蓬莱峯愿妾世世居王宫

秦宫词拟李贺题秋景

凉波翠湿南山影露滴金人光炯炯秦王夜半卷衣回楼壁斜开蜀云冷西宫桂熟
离离子海童不归一尘起蛄啼老石不胜秋小玉弄香惜香死臙脂影破澄潭白菱角尖
尖不堪摘鲜红皱緑未滿舡楼前凉兔光团团

汉宫词拟温庭筠题冬景

石鲸呿浪摇金池吹尽宫梅如雪枝避风台高风不到寶帐熟眠人未知象炉红炽
狻猊影氎氎软翠鸳鸯并李娘唤春春为回咲却人间求火井椒房小妓起常先玉鉶暖
手濯温泉白头臣朔寒无履待诏金门霜满天

送金秀才归侍（以贞）

风吹历阳树石城悲早秋高堂入远梦拂袖登吴舟金陵官酒如乳香酌君送君朱雀航前日同来二三伴此时望君俱断肠科名古来人未羡富贵不如归故乡年年随计多辛苦十上风尘竟何补秋卷客将篋内归彩衣重着阶前舞当时县令亲劝行今日还家父老迎门外清溪仍可钓山下石田身自耕子身长健亲长在黄金如山不可买君不见长安城中罢官客欲作布衣何可得（欲一作求）

吴节妇词

赤尘晓拥青丝骑玉镜愁鸾落红泪冰魂偷逐水仙归绮楼一夜灵犀碎六曲阑空不碍春带罗盘风轻扬尘池波不动暮光碧青天影落桃花云相思月照楼前水离离芳树留红子无情桃李乱中开不学夫容抱霜死

与徐德望寫扇上

南州高士忽相见求我为画白团扇戲拈秃笔扫云山顷刻终南眼中见昨夜西风起天末坐使清凉夺炎热劝君此扇莫弃捐不用留取待明年

守宫词

钿合和丹食龙子臙脂夜凝神血紫老蟾玉杵寒丁东鸾尾轻轻飞碎红织成穷袴千盘带蝶粉蜂黄镇长在天桃一点老晴春门前鱼目深如海

杏林图

山人种杏白云中谷口花开千树红自惜朦胧带朝露莫愁零落向春风春风几度花开日炼得丹成应可食妙年有术济人多况君自是渔霞客

云山图

青山青青白云白一尺小溪千里客扁舟舣岸不见人鸡声何处秦人宅桃花流水春鳞鳞不识人间有战尘待得紫芝如掌大归来闲作太平民

题金华王氏洁养堂

金华之山何岩巍上有楼观当云霄仙人时跨彩鸾下夜静月明吹玉箫丹厓翠壁
饶烟雾正是初平牧羊处初平一去已千春白石于今尚如故君因采药时经过袅袅凉
飊生薜萝洞口雨余苍藓合松间秋晚白云多幽径闲行不辞远泠泠碧涧流常满赤松
来往此岩中曾见蓬莱几清浅有时高咏独归来回看明月上仙台瑶草无声露华湿天
风拂袖吟懷开闻道君家景殊絕南山有花如白雪兄弟相规侍母前儿身常比花同洁
花谢花开春复秋悠悠世事随东流惟有高堂风物在开门长对南山幽八珍美味非所
欲菽水奉亲欢不足但愿栖迟勿遽游岁岁相依在林麓君不见西家轻薄儿身随贾客
游天涯挂帆东去入沧海风涛汹涌无归期又不見南邻少年游侠客遥遥走马天西极
几时販得黄金归愁来应洒穷途泣人生忠孝当两全事亲且复终天年还须奋身佐明
主留取声名照千古

静居集卷二

●钦定四库全书

静居集卷三

（明）张羽 撰

○五言律诗

赠高邮许晋兼懷王顥

相见复相违尊前泣满衣交游吾与汝出处是耶非淮柳行将转江鸿去渐稀更怜
王子敬此去几年归

途中遇唐凯酌别前山

相逢多（阙）后相别片时间旧话匆匆酒离程官宦山军坡霜外（阙）寺舍雪
中闲情比若溪浪随君北度关

雨后登望

雨洗清秋出余云逐望开洞庭霜叶下阳羨暮帆来野嶂横当道寒流没钓台登高
正堪赋莫学楚臣哀

寄渡别驾贯

海岸投簪罢还乡不住城官轻汉别驾待重鲁诸生研沼寻常满书堂早晚成惟嫌
卖药处儿女尚知名

寄车孝廉昭

亭隱余不旧人推武子贤古书堆卧内流水到阶前畏酒心先醉吟诗思独玄更闻
懷逸兴相约访丹泉

园全懷全许二校书

市朝非我恋此地养疎慵园古苔连竹窓明雪在松素帷生道意清镜长衰容不见
羊求过空寻旧履踪

与学子沈集画并题

笔砚随人老云山发（阙）新昔心期后世余习自前身石埭残沙晓茅檐古木春
卜居能有此甘与白鸥邻

题（阙）翥画便面

垂钓乱蒲间心将鸥鸟闲长竿不设饵孤艇坐看山清晓乘流出薄暮放歌还寄言
同羣者所得匪（阙）

客中奉懷竹溪游好四首

共识王孙贵吾知长者贤逢人多话旧爱我竟忘年对饮频辞酒相思却放舡别来
成寂寞得句向谁传

右西斋先生

质朴古风存家连水竹村旧蒙公子爱兼得里人尊客至频倾酿闲时自灌园西楼
有枕席高卧任乾坤

右松筠乡老

四海尽王臣多君歷苦辛绳桥独往路雪岭几时春哭子余枯眼休官一病身还闻
有趣召未许便垂纶

右彦良别驾

君方还邑里我复离家园交臂仍相识伤心孰与论过桥闻访寺带雨共归村别后
交游冷唯应独闭门

右钧德贰令

寄周伯阳

薄宦志多违言归未得归一随江燕去五见塞鸿飞素发应添镜缁尘已满衣裁诗
拟相寄人到秣陵稀

题周山人所居

门掩千山外春风乱碧苔幽人爱此径樵子少曾来竹笋清心馔松花养性杯为君
淹俗驾累日共徘徊

寄金子敬

束发事边庭调弓白羽翎老知农有味病恶药无灵为客（阙）三径教儿诵五经
定应琴酒罢余兴到丹青

寄友人

旧宅闲坊里身形似鹤长诗才兼乐府儒服间戎装爱马开新廐留宾扫静房懷君
西望遠一鴈下斜阳

寄钱唐吴山人

占得闲坊住园扉近竹幽经方教子读药草课童收湖色摇春幌涛深入夜楼应骑
蹇驴去城市漫浮游

寄渭清遠

蒲室传衣后清名重一时外甥多似舅弟子已如师微密千花偈清淳五字诗板桥
西畔路风雪阻幽期

题徐士元画梅雪轩图

高轩岁莫情取物制为名人与梅俱素诗因雪倍清散盐能润物结实拟和羹稍待
花开夜来听扑树声

围城中懷友

风骨多儒相为师不憚贫买书高着价避酒屡辞巡经学传门弟纔衣墓里人懷君
桑梓旧宁比异乡亲

右李讷

破屋临湖住闲身似鹤长逢人矜侠气遇难耻儒装有妇频修药无儿解奉觞从来
多遠志今日在何乡

右莘野

感秋

烟火四邻（阙）蛩声孤馆幽人闲知永夜月白见高秋风露惊华发关河忆壮游
吾年已如此素志祇堪羞

懷故妻及亡儿（时在姑苏围城中）

故妻及稚子墓俱在吴兴每岁常一展省风尘阻絕泫然兴懷因赋短诗用寄哀悰

何处塋深情牵车出晓城冢间无白日镜里是前生积壤销钗鳳荒苔掩佩琮空余故衣在手迹尚分明

埋骨近莲宫松杉满径风明珠辞掌上白璧毀泉中卷有涂鸦墨花迷趁蝶丛伤心羸博者此恨詎能同

憇桃园

古巷号桃花茅檐背竹斜卖蔬供北郭放水与西家土脉通潮信湖光助物华我来思借地学种五文瓜

寄灵隱良上人

空界近诸天高居息众緣山如西竺岭人悟上乘舡定力能消病浮生不论年听猿曾有约幽梦遶云边

游三茅观

洞府閤眚云名从地脉分金毫开妙相玉札瑑灵文鹤驭三天下鸾笙五夜闻何因避世网香火事茅君

炬上人之金陵未还保叔塔院留赠

闻说离山久生緣遍外方三衣长挂钵一钵不持粮禅处松将偃归时草正芳残书看未了拟借最高房

题秋月楼

楼近素娥宫凉宵昼日同象筵看似水碧瓦映疑空曲宴怜规满冲情苦（阙）中

不见陈王苑委照绿苔中

来青楼

画粉叠楼腰青山不费招窓开明月夜帘卷白云朝淡借澄江映浓因落景饶何劳
双屐去千里访岩薳

寄沙门文藻

藻公多弟子住遍两峯间行道无拘着孤云自往还缁衣冲暮雨金策响空山愧我
游方内春风独掩关

围中懷方员外

作吏风尘际常懷隱遁情偷闲频谒告厌俗拟归畊月幌留宾卧花宫请客行旧书
空满篋一览一沾纓

登吴山西畚大成寺阁

境寂不生尘僧多是北人乐随天女仗花遶梵王轮（阙）室炉熏聚清泉茗味新
无生端可慕只恐愧吾身

陪方征君月游

园景弄春韶曾来醉绿瓢谁知明月夜尤胜艷阳朝竹碧茶烟度池清蕙气飘预愁
城鼓动独上木兰桡

憩海会寺南亭

亭子碧江浚云霞生遠心千山正摇落四客复登临地势分吴越涛声送古今悠然
白鸟意欲去更长吟

九日过东园

家居白日长学圃亦何妨延客开芳径留僧置净床夜灯山顶寺寒灶竹间房休沐
惟来此尘情得暂忘

云日弄秋晖玄斋坐掩扉草芳寒蝶恋竹静午禽啼雅会便诗侣闲行称道衣若教
邻近住争遣往来稀

楼中雪意

楼角聚寒鸦江氛掩夕霞乱云方似叶冻雨未成花天意怜贫士人情向酒家愧无
梁苑赋空拟咏瑶华

方遶人话别

兹别可无愁还乡岂浪游田园重作主家口半登舟雪意孤村远鸡声别墅幽送君
翻自笑归计转悠悠

正月二日雪

瞥屑复飘萧随春态更娇未甘从旧腊还解避正朝琪树花偏早朱楼玉易销若教
先一日应湿紫宸朝

奉（阙）园隱期予不至

雨馆卧多时园亭误宿期恨无飞去梦忽见寄来思聚首难如此论心复有谁妍词
何以报藏玩比青丝

寄方员外

萧散任天真浑忘是病身问安多省吏投宿半乡人尘鎖藏书阁风翻滤药巾未应
长闭户憔悴过今春

陪明天目会方员外东园

柴门连水竹车马少曾通人卧春寒里僧来暮雨中醉看新柳色吟对落花风何用

谈名迹余生已悟空

皋亭有感

忆昨初经乱家从此路携渔汀怜共泊僧舍记曾题同载人俱没重来思转迷客愁
政无奈况值雨凄凄

送方东园

云山已改夏花鸟尚留春却送还乡客空惭久滞人扁舟生旅思孤馆闭愁身唯应
掩窗卧倘有梦相亲

闰七月七夕

巧侣重招邀朱楼映晚霄凤机仍歇杼鹊翼再成桥云幄香犹在霞衣泪未消帝应
怜别怨暂许闰年饶

过西湖

拂曙度严城兰舟或且迎青山雾里出粉堞水中明妆断倡楼色歌绝妓航声繁华
任自歇心赏有余清

寓戴山僧舍

松杉古佛庐借地即安居鸟影流闲幔竹光摇素书山寒人语寂雨冷桂华疎一悟
三空意荣名信是虚

○七言律诗

吴兴南门懷古

郭门南面似襄州野树寒山对倚楼公子城空无食客霸王宅壤有荒丘夕阳冉冉
仍西下秋水茫茫共北流只是今时已惆怅不应更为昔人愁

送谷克让湖南侍亲并柬李中卿县丞

五两风生楚客归梦魂先已到庭闱九疑舜塚苍梧野三国周郎赤壁矶天地悠悠人自老江山鬱鬱鸟空飞若逢李白烦相问别后平安一字稀

僧斋寒夜二首

上方台殿驻余晖露下烟寒独掩扉山木萧条啼鸟歇道门清淨俗人稀钟兼遠籟回鄉梦鴈带新凉到客衣拟结许询同下榻自怜幽兴每相违

山馆萧条寝复兴经声遥出最高层客愁无伴依童子禅学多难忆古僧阶下鸣蛩沿定（阙）竹间栖鸽避悬灯遠游亦有幽栖志拟絕尘緣老未能

行药过西崦

白日都销笔砚间偶因行药到松关秋声不尽萧萧树夕景无多淡淡山虫响寒蛩僧自定苔荒深院客长门已知身世俱成幻莫叹西风鬓易斑

登德清百僚山

湖乡风景三秋后佛界轩亭四望开碧水翻从城里过青山直到县门来鱼商酒市晴偏集钓艇莲舟晚共回自古登高能作赋坐中谁是大贤才

寄述古道上人

选佛场中让长年爱投静刹寄高禅法身漫应人天供世谛兼通内外篇月照袈裟行道遍华飞如意说经圆闻师剩有藏书在拟借邻房未有緣

九日登道场山同吴逸人赋

忽惊九日当今日同在他乡望故乡百里山河天尽处万家城郭水中央帷间风动闻灵语寺里林疎见佛香不是避喧来此地无妨览胜到斜阳

扬州道中

马头津口足风波岁晏遥乘一传过南渡客来多汉语下江舡去半吴歌芜城总入
新编户瓜步斜连古漕河何处吹箫明月夜野田茅屋晓烟多

晚过淮阴

军城鐵鎖晓开关使节星驰未敢闲淮水东流应落海瓜州北去少逢山行人欲断
寒烟外远烧时明乱苇间却忆帝城风物盛礼成须复上春还

鳳阳使还口号

拜陵初罢雪云晴使者南还荷圣灵马上顿更新旧律风前重数短长亭逢人问俗
猜侗语到处寻源验水经却忆长千桥畔柳归时应待眼青青

正月晦日雪

不肯凝祥向腊前却来呈瑞入新年开妆已落梅花后学舞争居柳絮先乍积欲迷
芳草地易消应避艷阳天遥知大辂躬耕处共贺瑶华满舜田

雪中懷周大使倬

忆君官舍傍苔矶正是天寒雪拥扉堂上客来公吏散山前市罢估舡稀宦情淡薄
同流水乡思苍茫对夕晖岁晚荒村无可寄拟将诗句托鸿飞

雨中言懷

邑里萧条民未复斋居卑湿病相牵客愁连月唯闻雨农事关心拟问天自幸拙畊
终岁饱更慚中酒日高眠不才如此真堪弃敢负明豈费俸钱

送僧还天台省亲

戴君东去路迢迢应为宁亲到石桥江上中丞寻午墅沙边夜火杂寒潮宰官问法
留三宿慈母焚香制七条岁晚定知归本寺待予听雪坐中宵

菁山石梯阁与方二彝徐七贲周二复夜坐陪赋

忽逢晦日惊春尽为倚高窓到夜分东崦平连西崦树上方遥见下方云涧声人语
空中辨花气林香暗里闻莫道暂时留爱赏移家终拟避尘氛

赠释子良圮

辞家译徧五天书避乱聊寻废刹尼片月池中观色相千花塔下礼清虚行随流水
因竺后坐得新诗是偈余看说到城还不住余生汨汨竟何如

寄南屏渭长老

蒲室传心第一宗老寻古刹寄行踪散花偈就人争寫壞色衣穿自懒缝案上金经
皆贝叶手中玉麈是青松何年惠远重开社来听东林寺里钟

春日登戴山懷旧

选胜寻常此地行春日望湘湘更明白浪逼连阳羨树青山半掩闔閭城楼台高下
千家柳阡陌东西几处莺忽忆从前旧游处无端愁思一豈生

寄贈紫金精舍喜性二释子

精蓝石畔接城闌野水交游絕四邻过去真僧留半偈浮来古佛见三身夜深门有
听经虎岁稔厨多施米人遥忆两禅相对处俨然无着与天亲

舣舟孺山懷徐孺子

登高懷古重徘徊试荐山泉当酒杯此地不闻悬榻待当豈应为吊丧来（阙）栖
壤（阙）残僧散风动寒灯古殿开千载南州寥落甚独寻遗迹遶苍苔

奉同西斋先生前丘看梅

最爱前村双树梅千跼万萼映春开空怜地主能栽得却少闲人为看来弱蕊愁风
轻着水瘦枝嫌雪浅封苔不因重度溪桥险杖策应过日几回

题唐叔良（阙）斋

高斋每到思无穷
门巷玲珑野望通
片雨隔村犹夕照
疎林带水已秋风
药囊诗卷
开行后香爇
灯光静坐中
为问祇今沧海上
如君无事几人同

立春吴黄二友皆有作率尔同赋

邻舍萧疎水竹连
共看原野变风烟
青春又数从今日
白发应多似去年
世上浮名都莫爱
客中佳节且相怜
寻思岁计浑无物
只益新诗数百篇

元日试笔寫似吴黄二友

草綠南原裊晓尘
冰开池色动龙鳞
天边北斗回今日
江上东风似故人
莫忆往时悲往事
且将新句荅新春
余生愿见升平日
长对青樽寿老亲

游方山观梅

寻芳正及上春时
润道萦纡恨到迟
花似西湖先得暖
人如东阁总能诗
酒中瘦影依依见
席上寒香淡淡垂
日莫醉归簪满帽
从教人笑鬓如丝

奉寄梅雪

闻说公亭傍水开
黄茅为瓦不须栽
商舫无数青山逸
书案寻常白鸟来
已信漆园非俗吏
谁知关令是仙才
烦君莫抱穷途恨
万事都将付酒杯

次高静学先生韵

缁袍无里食无余
每被旁人笑著书
郭泰徒劳夸叔度
杨雄何敢拟相如
玉堂天上非吾梦
紫极宫前有敝庐
安得故人邻壤住
溪头来往赋闲居

题陈氏先陇图

云山漠漠冢嵬嵬
马鬣封前踣躅开
宗子祇縁懷牒去
路人时为看碑来
松间刍狗

埋秋草地底鱼灯彻夜台惆怅年年寒食近白杨风起为兴哀

送胡宗禹之播州驿丞

便路之官暂到家九溪穷处是天涯夜郎沙暖多龙迹盘瓠山回似犬牙浦口劳歌催画鹢门前使节咏皇华途中定有江行藁好寄东风万里槎

赠景山僧中道立

古寺残灯乱后稀独来林下掩柴扉化人每转千声偈辟地唯将一衲衣池上莲芳辞伴去山中松偃识师归非关愿薄难行道自是羣生与道违

寄方贞外

结发从戎二十年独挥赤管万人前新辞禄秩縁思隠闲（阙）斋居似（阙）禅病里每书除药券愁中久絶看花筵懷君不隔天涯遠只在荒城（阙）雨边

寄王止仲高季廸

祇恨孤城未解围围开翻遣别相知夕阳江上忽忽酒细雨灯前草草诗有梦直从花落后无书空过鴈来时郭西古寺题名处今日重游却共谁

题故秀才陈哲手抄杜诗

世间无药补清羸身死双亲却倚谁少妇寫藏临没语故人收得旧编诗空窓夜漏沾书检壞壁秋尘落砚池须信才名天所忌后生休更擅文词

送张宪史之江西

燕子归时却■〈禹佳〉家洪州迢遞在天涯风帆落浦朝投驿江火明堤夜涉沙客里寄书逢驢便幙中提笔待霜衙来春我亦寻归棹约尔南湖看杏花

复公録文见寄

空堂燕坐一灯悬
僧腊多应倍俗年
老去已除行脚债
悟来不说定心禅
千花礼遍诸天降
半偈都将万法传
每愧尘劳烦见问
同乡兼恐更同缘

重阳道院

玉洞泉香草自春
丹楼南下瞰城闉
青衣童子曾来地
白石先生过去身
九转炉寒销宿火
七真堂古锁秋尘
松间道士多凡骨
未省谁为出世人

灯花次韵

画堂银烛照歌钟
醉眼俄惊火树红
白玉屏深留晚艳
绛纱笼暖护春丛
阑干清泪非因雨
狼藉残煤捻为风
更忆禁垣归路静
金莲随马散文虹

寶叔塔院

赤阑闲倚化人宫
湖上春阴望不穷
百尺楼台空相外
万家城郭雨声中
斋房漏滴莲花水
讲殿经翻贝叶风
自咲世缘心似石
拟焚香炷问生公

赠兰室居士袁省掾

弃官归去学寻真
有道何愁白发新
湖上寻春灵寿杖
松间对客华阳巾
佛书漫写缘修静
丹药频丸为施人
自愧后生无所事
也辞冠盖乞闲身

寄伏虎道场联上人

圣明亲选黑衣人
似共名山有宿因
地上布金多长者
室中传偈搃门人
法身已应诸天相
定力能消万劫尘
愧我才名非凿齿
道安何事独相亲

送刘孝廉入蜀

长亭把酒唱离歌
别路迢迢奈尔何
淮水东来吴地尽
函关西去蜀山多
秦宫万井生禾黍
汉阙千门长薜萝
劝子慎须崇令德
莫将功业更蹉跎

宿庆上人房

朱萼寶地絕尘埃松下闲过步綠苔仙梵更从莲室度佛香时到竹房来已知静者
通禅观重听高僧话劫灰寒榻不须灯照卧夜深明月满池台

咏美人手

嫩于春笋白于霜轻拂菱花试晓妆弹瑟每嫌银甲小吹笙还爱玉纤长宜将彩笔
题红叶倦把金针倚绣床拾翠归来芳径里逢人莫问锦香囊

○五言排律

送秦县丞

北人南住久五十始成名理讼通蛮语居官少宦情开尊山遶廨泛棹水浮城一饭
恩犹报三年政独平计工归上考增秩被深荣早晚械书到唯听新鴈声

送郑主簿

闾阖晓云黄龙盘紫禁长小臣朝上国天子坐明堂名入郎官奏班随奉礼将考功
唐典故治行汉循良秋雨莱芜甑春风召伯棠因君清似水挹彼当离觞

十月一日从幸太平门阅武应制

四海清无战三农乐有秋元戎陈虎旅天子诏貔刘肃杀遵时令登临展豫游江山
明组练海国壮貔貅旄钺传天语韬铃稟庙谋射蛟应小汉搏兽已卑周佳气投丹穀祥
风转采旂武功今已脩文德愿兼修虚忝金銮客元才咏大搜

元日晓祀

皇明严祀典大孝极尊亲太室躬临裸先陵复遣臣九重颁命晓一节渡江春丰沛
真王地粉榆旧社民骏奔祇事早斋宿省躬频殿阙风云盛楸梧雨露新陈兵森虎豹清
道表麒麟列岫天垂障长淮地涌绅潜光腾白璧盛德琢苍珉闭匠嗟秦侈除痍识汉仁
玄堂存秘器玉座仰清尘亿载灵如在元正礼再申加笾时物脩奉俎大牲陈祝嘏传多
祚余膺及众宾献酬神惠浹醉饱圣恩均风雪催归盖江湖恋帝宸大郊期不遠言迈敢

逡巡

元夕钱塘怀古

闻说萧朝事今宵昼日同都人丹阙下天子彩楼中灯焰千枝月衣香百和风坠钿
随步拾游骑彻明通节物长年在豪华逝水空无因见遗老重问古行宫

春雨轩

霖霖洒空蒙凭轩望不穷温迷回鴈渚暖带落花风着柳应催绿（阙）桃更上红
气萦蛛网（阙）润合燕泥融送响苔阶上飘寒绿琐中此时须下榻琴酌暂相同

杏隐

绛萼竞春华丹光照倡霞虎眠应守穀莺过每衔花望处疑仙岛移来是病家寫方
看子坠曝药避阴遮山客留仁种贫人寄券賒茂陵那解此徒说枣如瓜

竹雨轩

竹里萧萧雨轩中景自幽明珠当砌落碧玉倚阑愁烟护常疑晚风随镇似秋响分
弦上度色借画中浮翠叶濡偏重琼林着更柔羽沾飡实鳳衣湿在林鳩嶰谷阴时觅淇
园暝处求青苔知渐厚绿雾觉添稠截管情何及题竿兴未酬阮生宜径造着屐与谁游

静居集卷三

●钦定四库全书

静居集卷四

（明）张羽 撰

○五言绝句

杂咏

空山无四邻闲扉映秋水时有负樵人唱歌白云里

秋夜卧病

清斋夜方寂卧病谁相亲秋萤如有意殷勤来照人

题蕉

移得山后蕉种傍山前屋扶疎数叶开还如山后绿

绿绮含风弱芳缄卷露新忆在闲庭院婆娑映玉人

题画

江水绿沉沉危峯倒夕阴何人倚高阁月出听龙吟

白云飞不尽青山断复通涧道多机杼时鸣春树中

长松生夏寒野水净人目借得相牛经闲来石上读

舟随烟鹤远行尽碧溪湾归来北窗下写得向来山

一雨涨新绿云开四山绕人掩荜门深斜阳照江鸟

高人自无偶独向亭中坐日落山风来时闻松子堕

落日四山遶空亭面面开白云如有待山人殊未来

涧路独行迟闲云逐杖藜欲寻泉落处应祇野猿知

絕句

荒村无四邻茅斋深夜雨田犬时一鸣厨人时中语

十载湖边客何人伴杖藜登山临水兴惟有阿通知

题萱

佳人重生男竞种宜男草东邻有孀妇对花空自老

塞马图

弓劒随身带阏氏细马馱天寒水草远更过白狼河

阵火照红云龙庭战未分全家上马去应避李将军

重午四咏守宫艾虎百索辟兵符

玉杵捣香酥试入来红髓底用苦关防妾身清似水

作伪欲成真狞狰门上挂若教鬼有灵看来应未怕

千丝复万缕向儿臂上纏教儿长寿命一寸一年年

四海静无尘干戈化缙绅兵符何用戴聊复应时新

杂题

我掩手中卷尔罢膝间琴相看坐成晚山水有余音

竿棹每随身情于白鸟亲一蓑江上老阅尽往来人

岩云余轻素红叶当风堕林亭江色多谁能来此坐

云寒鸟归急落日千峯敛不见暮樵归林扉静中掩

红叶下秋浦归帆未到家今朝五两正直过长风沙

题章舟隱画

扁舟小于叶来往横塘里为看青山多画得青山似

观魏武纪有感

促路蜉蝣短雄心日月长玉床飘總帟犹自恋余香

题倭翁

万里扶桑国年年贡扇来皇都无酷暑赐尔拂尘埃

山居七咏题画送周伯阳

盘云陟危磴十步五回坐道旁无虎迹曾有游仙过

右游仙顶

秀出众峯顶寻常云雾里上有万年松食之令不死

右白石坞

涧路行将尽高阁倚空虚月明万籁尽空山闻读书

右茅坞

空林无人行下有百年墓洒扫复何人萧萧白杨树

右昆仑山

竹林路阴阴寻幽不觉深不比羊肠坂空伤行客心

右九曲山

偶逐微官去，翫掩林中宅。手种茱萸树，归时高几尺。

右冷坟

春风试茶处，潭上葛花开。去尽同游伴，伤心此独来。

右月潭

林皋秋色图

岩云拥轻素，红叶当风堕。秋色满空亭，无人来此坐。

碧岫晴云图

岚深山影寒，樵响不知处。绿树早莺时，千峯一家住。

题竹

幸逃斤斧忧，独抱风霜节。时有饥禽来，枝头弄明月。

四贤诗（并引）

洪武十一年，命天下郡县修志书。平阳魏公同知湖州，寔莅其事。旧志郡县官惟守令有题名，余皆不录。至是，吴郡续志自僚佐以下皆得书焉。其固为忠厚而不没人善，盖如此。他日又摘晋唐以来郡守之尤者四人为胜游图，以致其尚友千载之意云。

胜日罢书，经扬舲出，逺垫清流，兼峻岭，应不减兰亭。

昨别征西幕，神闲务亦闲。此中可高卧，何必是东山。

刺史放衙早，轻舟泛碧池。祇应官事了，来写放生碑。

闻道苏湾里，苏公旧此游。湖天风物好，应胜在儋州。

寄方以常

水竹小窗西新诗待我题相过虽不厌只怕踏春泥

清晨眺高阁积雨春阳晦望望君愈遥青山愁独对

六一泉

醉翁去已久废寺泉流圃朝来春雨深照见山鸡舞

苏公堤

冷落百花朝无人上画桥东风吹绿草依旧舞裙腰

保公岩

青苔满石龕隱隱砌趺迹想见夜禅深岩前雨花积

寺所书所见

荡子秋未还双蛾敛寒翠微步入莲宫谁知此中意

修廊行复怯风吹合欢带小立避游人佯对香炉拜

兰室五咏

杂麝犹能别兼风更不分静时还自得觅处却无闻（右香）

秋风凋绿艳芳气生来歇但使本根在宁愁萧艾没（右根）

冒土红初茁绿池绿渐紫道人偏爱惜不敢下阶行（右芽）

泛露光偏乱含风影自斜俗人那解此看叶胜看花（右叶）

能白更兼黄无人尔自芳寸（阙）无不大容得许多香（右花）

题画

孤村翳余景秋风在空谷落日淡烟芜坐看千里绿

谷口人未归凉风满林樾孤村云气深千山雨初歇

问徐道士病

修竹闭云房细路穿乱石如何尘中人来问仙家疾

月潭试茶

乞火从山妇临流煮涧芳怪来泉味好并带落花香

水边桃花

何处惜春华芳桃水际花明朝风雨后流落傍谁家

方园杂咏

抱瓮汲晨井灌余烟景微独坐卷修绋园芳犹满衣

右憩瓮台

小坂平如掌春深绿草肥牛羊识家近日夕自能归

右牛羊坂

北亭望南隩高林悬薜萝日暮鸟声急时闻劳者歌

右南隩

坐爱茼蒿绿王孙罢远游不似湘江上千里动离愁

右芷径

故苑金沟断荒园碧草秋南朝多帝泽曾向此中流

右古沟

采采不盈襜幽芳逐微步欲为公子裳敢谓行多露

右采蓝径

杖藜成独往青林人迹稀日晏迷归路翠实冒秋衣

右苍耳林

举头见南山相去能几里莫言不在山看山如屋里

右见山坡

邻近列仙居瑶林閤清境夜深明月来送过旛幢影

右道林

结屋连碧筱虚牖抱园开如何天上月移向壁间来

右月牖

园井汲寒绿当窗煮金屑应有山僧来从君泛春雪

右茶宴室

一壶兼一杖独行东垧里稚子倚柴门孤烟屋头起

右东塿

戏呈金（以贞以贞曾许香鼎因诗觅之）

性同韦刺史坐处爱焚香宝鼎并鸡舌烦君早寄行

寝斋夜咏

沉沉寒夜里寂寞有谁怜赖得窗间月犹能照独眠

题横塘萱草用酒字韵

酒号忘忧物花名乃相偶忧来对花坐何如饮美酒

○七言絕句

题画

九迭屏前水倒垂古今唯有谪仙诗道人杖策穷源去寫得峯头乍落时

双驭图

内官妆束樣能齐苑路春风信马蹄共说放朝无一事看花直到夹城西

悼高启

灯前把酒泪双垂妻子惊看那得知江上故人身已死篋中寻着寄来诗

消息初传信又疑君亡谁复可言诗中郎幼女今痴小遗藁千篇付与谁

生平意气竟何为无禄无田最可悲赖有声名消不得汉家乐府盛唐诗

絕句

凭阑两客怨斜曛此日同吟只欠君江阁虽高犹不见几重山水几重云

挽杨基

恨不寻君未死前须臾离别便千年慰人幸有童乌在他日应能续太玄

絕句

青苔黄叶掩柴扉遠客无端夜忆归林外月斜童子睡独临残烛解寒衣

夏雨新霁图

看图忆得住山阿茅屋深深隱薜萝风雨过来啼鸟静白云更比綠云多

题倭翁

小国贡来东海外尚方分给午门前终身永保君王赐总遇秋风莫弃捐

青宫甲观倚云开侍从如云总俊才昨暮传宣容握扇丹墀清晓谢恩来

贈五河驿丞孙本

驿楼鬱鬱古河濱日日征帆送使臣不共灯前一杯酒谁知亭长是诗人

登韩信城望漂母墓

遶城春水綠含漪遥忆沙头漣紉时若爱当时一杯饭千年孤冢有谁知

题画二首

千里生还不负期入门成喜复成悲忽看画里青山色犹道长干雨后时

孤舟五月发金陵遥见家山喜不胜却忆石头城上望白云何处是吴兴

赠卜者

老依卜市不论钱习静年来白已玄安得相逢王辅嗣垂帘闲坐说先天

暮过西崦

白水泱泱遶壤堤隔林遥听夕阳鸡闲行每到东边少为有青山在屋西

题画

百道清泉石上流白云初起乱峯秋此中疑有陶弘景高卧松风第一楼

旧是云山自在身误将书剑逐风尘犊车何日移家去还作条桑种杏人

横云迭嶂图

丹崖碧嶂杳难攀台殿高低积翠间试遣北人来看多应说似洛阳山

题画赠长兴杜典史浚（其人曾任武昌肆射平其乡里地名）

下若溪头山似戟武昌门外柳如烟何如肆射平其去束带闲畊墓下田

题画赠税司吏

缗钱筭罢无余事日日溪头醒复醉长安七相并五侯何似吴兴折腰吏

梦中赋

西施江上采荷花孔盖如云万扇遮如今不敢人窥着昔日人看隘若耶

重午回文

轻罗扇试新词好玉臂双（阙）彩缕长清簟昼闲人鬪草午风微袅篆炉香

寄灵隐良泐二长老

两禅相对一灯悬
鹫岭龙宫地悄然
七百年来无好句
泉声空遶寺门前

孟浩然雪竹图

雪满秦京欲去迟
故人当路谩相知
平生多少惊人句
却向君前诵怨诗

刘伶谢安陶潜王羲之像

鹿车载酒竹间期
不记山妻泣谏时
已识形骸为外物
何须荷锺镇相随

典午风流数谢公
高标自许伯夷同
桓郎跋扈苻郎健
都在尚书雅量中

五儿长大翟妻贤
解绶归来只醉眠
篱下黄花门外柳
秋光不似义熙前

白葛为巾不裹头
兰亭会里最风流
老来忘却观鹅癖
只爱山人许远游

林下烧笋

乱堆黄叶就林边
火力均时味已全
日暮栖禽疑未下
竹根犹自起残烟

题画

玉洞仙桃万树花
楼台仿佛蔡经家
神丹炼就何曾服
乞与山童饲白鸦

月满瑶坛露气清
三花树底坐吹笙
到门解说长生理
只有茅家好弟兄

题手画云山图赠王生泰

积善桥东旧宅间
独随阿母住青山
鹿车奉引行春去
多在云松九琐间

听老人琵琶

老来丝索久相违心事虽存指下微莫更重弹白翎雀如今座上北人稀

梅雪轩

山如东郭先生里屋似西湖处士家为问轩中清白吏还应比雪吐梅花

云山图

薜荔花开僧舍闲佛香时列竹窓间朝来小试南唐墨寫得溪南数叠山

舟次孤山

水遶荒山路半斜墓园无主属官家我来正是梅开日满目蓬蒿不见家

最胜亭感旧

丝雨微消紫陌尘湖光冷落似无春朱门记得曾来处杨柳青青不见人

海会僧房

床头书卷绿牙籤病起名家手自拈气息未回禅诵少犹能弹舌讲楞严

寄友

客路寻常怨别离况逢秋色倍堪悲一封书到千山莫正是思君独坐时

哀宋君女阿归

客来唤出最钟情暂别谁知便隔生昨日闽州书信到伤心犹有阿归名

晓发嘉兴

城乌啼散驿楼空一舸苍茫曙色中不是故人今夕共定应愁絶雨兼风

舟中闻歌

何处清歌短更长渚风沙雨共凄凉不须直向天涯听一日辞家已断肠

雨中想东园杏花

斋居清昼四无邻黄卷中间过半春落尽杏花浑不看少年人似老年人

东园报杏花未开

芳葩未拆避春寒日日烦君绕画阑莫是主家曾见惯含情欲待外人看

懷黃野得

疎散元非用世才日高林戶尚慵开为怜湖上青山好行到冬青树底来

孟浩然像

横门雪满放朝回油壁金鞍覆地来谁是蹇驴乌帽客解吟花逼艷阳天

头陀庵聰道者房

苦行能便自小持松龕寂寂到人稀斋厨日晏孤烟起童子新将施米归

题渊明白衣送酒图

几回咲把菊花枝遥望南山自咏诗不值白衣人送酒岂堪懷抱独醒时

寄题兰室柳湖归隱图

挂冠归去祇看山心寄孤嵐野鶴间试数同时戎马客几人投老似君闲

寄兰室

离思逢秋自不胜忽看书札恨翻增遥知雨絕林塘静独坐高斋似定僧

又

行人共识孝廉家流水当门畧杓斜日日高堂称寿罢倚栏闲看紫荆花

题徐贲画南浦亭图

离离烟树接通津南浦亭前碧草春客里见图先汨落只緣身是此乡人

静居集卷四